



Wantok



Namba 2040 Oktoba 3 - 9, 2013 28 pes

Niuspepa Bilong Yumi Ol PNG Stret!

K1 tasol




Nau yu ken Teksim Wari, Tingting, Painim Pren o Pas bilong yu i kam long Digicel namba **7235 6149** na bai mipela putim long Pes 2...



WINIM LASPELA KIT HAUS LONG OKTOBA

Harap na top ap nau, na yu ken kamap lucky winner bilong dispela KIT HAUS. Moa top ap you mekim, moa entries bai yu kisim.



BRUKIM HET LONG EKSAM: MOA long 420 Gret 10 sumatin long Gerehu Sekonderi skul Mosbi i sindaun long fainol eksam wantaim moa long 47,000 wanlain bilong ol long 252 provinsal na sekonderi skul long kantri. Eksam bai ron long 9-pela de i bin stat long dispela wik Tunde na bai pinis long neks wik Fraide long lukim husat tru bai kisim spes long go hetim skul i go long Gret 11. Dispela poto bilong Nicky Bernard i soim Nelly Gado, Karen Bolla na Nathaniel Boski bilong Gerehu Sekonderi i skelim tingting taim ol i sindaun long eksam aste bikos taim bihain bilong ol i stap long ol ansa ol i raitim long ol eksam pepa.

UBE bai no inap bungim

2015 gol Nesanel Rises Institut i tokaut long wanpela ripot bilong en....

Insait: Catholic Reporter bilong October insait - p9,10,19,20

Tambu long salim buai, tasol lo i no redi yet - p3

Ol 23 Kumul pilaia i redi long Wol Kap - p28

Stanley Nondol i raitim

GAVMAN i no stap long gutpela mak long lukim Milenium Developmen Gols (MDG) bilong Yuni- vesel Besik Edukesen (UBE) i karim kaikai long yia 2015 we gavman i bin makim long winim dispela gol. Wanpela wok painimaut bilong Nesanel Rises Institut i tokaut long wanpela ripot bilong en.

Aninit long MDG, gavman i putim 2015 olsem yia mak long lukim olgeta pikinini mas go long skul stat long elementeri i go long gret 12, tasol dispela wok painim i tok klia olsem dispela plen bai no inap karim kaikai long 2015. Wanpela wok painim pepa bilong UBE em Dokta Arnold Kukari i bin raitim i tokaut olsem maski gavman i putim fri

edukesen long 2013, planti pikinini i no go long skul na ol i raun nating autsait. Dispela ripot i tok tu olsem nau i gat bikpela nid long gavman bildim planti haus bilong ol, klasrum na givim trening long planti tisa long kantri. Edukesen na Fainens Minista, James Marape i bin lonsim dispela ripot asde long Mosbi. Dispela ripot i tokaut

olsem planti sumatin long gret 8 na i go antap i no gutpela long Tok Inglis na i no mekim gut long Inglish eksam na i feil. Ekting Edukesen sekeri Dokta Michael Tapo i tokaut olsem long 2015, 75 pesen bilong sumatin bai go long skul na MDG 2015 bilong UBE bai i no inap karim kaikai. I go moa long pes 2...

Tom Piper Braised Steak & Onions

Teis i stap long bipo yet!!

Braised Steak na Onion!

Planti mit na Swit Moa!



Teksim Wari, Tingting, Painim Pren, Wantok o Pas bilong yu i kam nau.. Digicel namba: 7235 6149

Larim PNGSDP i stap - Oposisen i tok

Stanley Nondol i raitim

OPOSISEN i tok gavman i no ken makim man long kamap siaman na memba bilong PNGSDP bikos dispela pasin bai opim rot bilong paul pasin i kamap long mani bilong Westen provins.

Strongpela Opsisen man na memba bilong Kundiawa, Tobias Kulang i mekim dispela tok bihain long gavman i rausim Sir Mekere Morauta na makim nupela siaman na memba.

Praim Minista Peter O'Neill i makim Isaac Lupari long memba long bot bilong PNGSDP. Mista Lupari em i Sif ov Staf bilong Praim Minista O'Neill.

Mista Kulang i tok PNGSDP bod siamen na menesmen i ron gut na i gat gud govenens na gutpela akauting sistem long menesim mani bilong Westen provins.

Mista Kulang i tokaskim

watpo na Praim Minista Peter O'Neill i makim Politikel Staf bilong em yet go insait long kamap bot memba bilong PNGSDP.

Deputi Oposisen lida Sam Basil i askim Praim Minista Peter O'Neill long rot gavman bai skelim 63,4 pesen bilong mani bilong Westen pipel taim gavman i tekova.

Mista Bsail i tok husat tru bai kamap papa bilong main em tu gavman i no mekim klia na wanem rot na husat bai menesim mani bilong Westen provins pipel.

Mista Bsail i tok onasip bilong OTML em bikpela toktok stap yet na gavman mas tok klia long ol pipel.

Mista Basil i tok gavman i tekova na tok em i kisim 100 pesen na go het long makim nupela bot memba na siaman bilong PNGSDP na kamapim wok painim i go insait long PNGSDP tasol rot bilong onasip na menesmen i no klia yet.

Wankain taim Sir Mekere Mourata i tok Praim Minista O'Neill i mekim bikpela asua long kamapim ol senis bilong lo na makim ol man bilong em yet go insait long PNGSDP long lukautim K8.5 bilien kina bilong ol Westen provins pipel.

Sir Mekere i tok dispela lo bilong tekova wantaim no gat kompensesen bilong papagraun long envairomen bagrap i asua na tok gavman i mekim dispela senis long kamapim stil pasin.

Ol memba bilong Westen provins i sapotim Praim Minista O'Neill gut tru long muv bilong em long tekova na tok dispela em kamap long gutpela bilong ol pipel bilong Westen provins.

Las wik ol papagraun bilong CMCA eria i tok ol i no sapotim tingting bilong ol memba bilong Westen provins wantaim gavana Ati Wobiro. Ol i tok PNGSDP i mas stap yet na ol i laik gavman i mas givim olgeta 63.4 pesen go bek long ol.

Kot disisen bai lukim OTML i baim milien

OLGETA de nau, yumi wok long lukim ol nupela developmen long gavman i tekova long bikpela Ok Tedi Main (OTML) long Westen Provins.

Long dispela wik, planti toktok i kamap long sait bilong ol papagraun, gavman na PNG Sastanabol Developmen Program (PNGSDP).

Wanpela long ol em Kiunga Provinsal Kot disisen we i

odaim OTML long baim planti milien kina i go long ol papagraun bilong main pit eria long Star Maunten.

Kimka Sepiyan wanpisin em ol papagraun bilong Spesel Maining Lis long Ok Tedi Main we Kot disisen i luksave long ol olsem ol papagraun we OTML i no baim ol yet, bihainim kot oda bilong 2007.

Ol ripot i bihainim dispela Ki-

unga Distrik Kot disisen, stet wantaim ol ejensi bilong em olsem Minerels Risos Atoriti, Minerels Risos Developmen Kopresen na OTML bai peim planti milien kina i go long ol Kimka Sepiyan wanpisin olsem royelti, dividen o winmani, bisnis developmen gren na kompensesen pekej na ol bai ol bekdetim i go long taim main i bin op klostu 40 krismas i go pinis.



LOGOHU AWOD: Sir Peter Barter kisim luksave olsem Sif taim Gavana Jeneral Sir Michael Ogio i putim Logohu Medol long en long wan pela liklik seremoni long Madang. *Poto GG Midia.*

UBE bai no inap bungim 2015 gol

I kam long pes 1

Dokta Tapo i tok i gat planti samting o hevi we edukesen dipatmen na gavman bai mekim long lukim olgeta sumatin i go long skul.

Dokta Tapo i tok gavman i mas kamapim lo long olgeta pikinini i mas go long skul, na sapos ol i no go, papamama i mas kisim mekim save bilong lo. Em tok dispela bai helpim UBE long lukim olgeta pikinini go long skul na bai no ken raun nating long strit.

Ripot bilong Dokta Kukari i tok moa olsem maski gavman i putim fri edukesen na mekim planti gutpela samting bikpela namba bilong pikinini i no pin-

isim gred 8. Sampela bilong ol samting gavman i mas mekim long olgeta pikinini i stap long skul na kisim gutpela edukesen em,

- Gavman mas mekim edukesen mas kamap fri olgeta yia,
- Kamapim planti tisa koles na givim gutpela trening long olgeta provins,
- Lukluk long hevi na wari bilong tisa olsem gutpela pe a haus,
- Ol tisa mas kisim longpela trening,
- Apim namba bilong lesen taim (period) bilong ol sumatin

- Givim planti insevis kos long ol tisa
 - Kamapim rivi long Outkam Beis Edukesen (OBE)
- Ripot i tok gret 8 sumatin raun long kantri i no mekim gut long Besik Edukesen Eksam na long 2006 risalt bilong numeresi, litresi na jenerel sabjek i pundaun kam daun long 40 pesen.
- Ripot i tok planti bilong ol sumatin i kopi o lukim na raitim ol ansa long taim bilong eksam.
- Ripot i tok moa olsem namba bilong ol sumatin i go antap moa na i no tisa i sot, na tu, ol tisa i no gat inap gutpela save long skulim gut ol sumatin.

Polis Ripot

WABAG: Wabag Distrik kot i givim bikpela mekimsave tru long wanpela man husat bin brukim lo na karim bia i go insait long provins. Dispela man, Sawik Kandapol bilong ples Teremanda klostu long Wabag i bin baim kot long K5,000 aninit long Enga Provnsal Lika Ekt. Na kot i bin sasim draiva bilong 25 sita PMV bas long K1,000 fain bikos em i karim bia i go insait long provins. Ol polis long Enga i tok Kandapol i bin haia long dispela bas long Hagen long karim bia long taim em i no gat laisens bilong salim bia. Wanpela polis rot blok long Yaibos i bin stopim PMV na ol i painim bia em i wok long karim i go long salim long Wabag.

NCD: Ol pipel husat i no inap long baim K300 spot fain long kaikai buai na spet long pablik bai wokim komyuniti wok. NCD Gavana, Powes Parkop i tok sapos husat man o meri i no inap long baim K300 spot fain bai em i mas mekim komyuniti wok inap tupela aua. Dispela lo bilong tambu long salim buai nabaut long siti na kaikai na spet nabaut i bin stat long Tunde 1 Oktoba. Tasol ol lo bilong wanem kain mekimsave na hamas mani bilong baim fain bai i redi long pinis bilong dispela mun.

NCD Ol polis long Mosbi i holim pinis tupela man bihain long indai bilong olpela memba bilong Kundiawa Gembogl, Peter Waieng. Sif ov Polis Operesen Deputi Komisina Simon Kauba i tok meri husat i bin stap wantaim Waieng long dispela taim, i wok long helpim ol polis long wok bilong ol. Em i tok bai ol i arestim sampela moa man klostu nau. Em i singaut i go long ol lain bilong Mista Waieng long larim ol polis i mekim wok bilong ol long painim maut na arestim ol lain husat i bin kilim em.

KOKOPO: Ol polis long Is Nu Briten i holim wanpela man na sasim em long stilim K100,000 bilong wanpela yut grup. Polis ripot i tok dispela man bilong ples Korofeigu long Isten Hailans i bin giamanim ol yut grup bilong ples long 2008 na ol i kamapim yut grup. Em i tokim ol long bungim mani na bai em i stretim rot bilong ol i go mekim wok long ol fam long Australia. Tasol em i kisim dispela k100,000 bilong ol na go stap long Is Nu Briten.

LAE: Sikispela man em polis i bin sasim ol long kilim tripela man a kamapim bagarap long bodi bilong ol arapela long Black Cat Track long Morobe provins i bin kamap long kot long dispela wik. Krismas bilong ol dispela man i namel long 19 na 27 yia. Polis i sasim ol long tripela sas bilong kilim man na 10-pela sas bilong traun long kilim man. Polis i ritim ol dispela sas pinis na kot o surukim de bilong ol long kamap gen long kot i go Desemba 20. Bai givim taim long ol polis long pinisim olgeta wok bilong redi gut long kotim ol sikispela man ya.

LAE: Pasin bilong maritim moa long wanpela meri em i primitive pasin na i no gat ples bilong kain pasin olsem i stap long nupela laip bilong tude. Lae Distrik kot mejistret, Nasaling Bingtau i bin mekim dispela tok long taim em i harim kot bilong tupela meri husat i bin pait. Tupela meri ya i maritim long wanpela man. Wanpela meri i bin kotim narapela long kaikai nus na han bilong em long taim tupela i bin pait. Mejistret i sasim meri ya long K100 tasol em i tok dispela kain pasin bilong maritime moa long wanpela meri i save kamapim planti hevi insait long komyuniti.

MT HAGEN: Foapela meri i bin dai na nainpela arapela i stap long Hagen haus sik bihain long ka ol i stap long en i rol i go daun long maunten na kapsait. Dispela birua i bin kamap long Sarere nait long Konbakane long Mul-Baia ilektoret. Ol dispela 13 meri wok longgo bek long ples bilong ol bihain long wanpela nesenel konprens bilong ol Baptis Sios long Hagen. Ol i bin stop long maunten na draiva i go dring wara na ten sita ka ya i rol i go daun na dispela birua i kamap.

Joe Cletius, Goroka – 20/09/2013

Dia Wantok Niuspepa, mi wanpela mangi Raikos mi lukim wanem James Gau, memba bilong Raicoast mekim. Hau na memba lukluk wansait long Bugati eria tasol, baim nupela kar bilong ol yet, tripela LLG olsem wanem? Raikos, Naurawa na Nayudo. Plis memba luk olsem 5-pela yia go lus nating nau. Gau famili nau kamap bisnis lain nau, nupela krusa kar ol kisim na ol pipel bilong Raikos olsem wanem? Memba mas bilong Madang taun olsem na yu stap long taun tasol na ranim bisnis. Ausait ilektoret mekim wok na memba bilong Raikos yu, ten yia nau, no gat senis. Yu mas kuki bilong palamen lain ya.

Vincent Aikim, Madang – 02/10/2013



AUTIM WARI O TINGTING BILONG YU NAU!!!

Tambu long buai tasol i no gat lo yet

Frieda Sila Kana i raitim

GAVANA Powes Parkop i surukim taim bilong stopim buai long siti i go wanpela mun moa, bilong wanem ol lo bilong sasim ol lain i salim buai na spetim long pablik i no redi yet.

Dispela tok, em i mekim long taim em i singautim wanpela nius konprens long Mande 30 Septemba. Narapela bikpela as em i surukim taim em bilong wanem ol lain bilong Mekeo long Sentral Provins i askim gavana long givim ol taim long redi gut.

Bihain long Gavana Parkop i bin tokaut long pasim olgeta buai maket long Fonde las wik, em i bin go long bungim ol pipel bilong Mekeo wantaim ol gavana bilong Galf na Sentral Provins. Em i bin tok long dispela taim las wik, olsem tingting bilong em i strong pinis long pasim buai, stat long Oktoba 1, tasol wanpela samting tasol bai senisim tingting bilong em, em bai toktok bilong ol lain long Sentral Provins.

"Mipela bai go het yet long stopim buai bisnis long siti, tasol bai mipela i go isi, isi na givim taim long ol lain long Mekeo na mipela bai makim na stretim ol bikpela makim ples long ausait long siti long helpim ol. Em bilong stopim holsel maket bilong buai. Mipela bai givim ol tok-save pepa long ol PMV na

long ol maket long strit. Tasol long siti em mipela bai go het long rausim olgeta buai maket long rot na pablik ples," Mista Parkop i tok.

Em i tok klia olsem ol loya bilong NCD i no redim gut ol lo bilong sasim ol lain i salim na spetim buai long pablik, olsem na givim wan mun moa na bihain bai ol i stat long sasim ol. Tasol long Tunde, Oktoba 1 long 4 klok moning ol polis na siti rensa i stat long rausim olgeta holsel buai long ol eria insait long siti.

Planti lain bilong salim buai i no wanbel na ol i strongim kona bilong ol, bilong wanem ol i tok dispela em wanpela rot ol i kisim mani, kaikai na stap long siti. Tasol gavana em i strong yet olsem, i gat planti moa lain insait long siti wantaim ol bisnis haus i wanbel tru long gavana i stopim buai.

Gavana Parkop i tok, em i no laik stopim ol lain long kaikai buai. Nogat. Samting em i laikim long kamap em long siti i mas stap klin na helti. Olsem na em i laik kamapim ol lo bilong stopim buai na siti i mas stap nat-ing.

"Man i laik kaikai buai i ken go long ol buai maket olsem Ruburogo namel long Sabusa na Brown Riva na Lareva maket long Hohola. Ol i ken baim tupela kilogram buai bilong ol na go bek long haus bilong ol yet na kaikai long laik na stretim

pipa bilong ol yet," Mista Parkop i tok.

Tasol insait long siti long pablik ples, em tambu stret long kaikai buai na spet nating.

Mak bilong sasim man em i olsem, spetim buai em i K50, man salim buai em K300 kot fi, ka, dingi o sip i karim holsel buai em K1,000, na balus i karim buai i kam long siti bai baim K10,000. Dispela lo bai kamap long Novemba 1 na i go.

Gavana Parkop i tok tu olsem klostu taim nau bai NCD i strongim lo bilong stopim olgeta samting i plastik. Em olsem ol pepa bilong basket, botol bilong koka kola, plastik bilong kairim

kaikai long stua na i go moa. Siti menesa, Leslie Alu i tok dispela em i no nupela lo. Nogat. Lo i stap pinis tasol ol bisnis lain i no bihainim, tasol nau wantaim lo bilong stopim buai maket, plastik tu bai pinis bilong wanem plastik i bagarapim lukluk bilong siti.

Gavana i tok, bihain bai NCD i kamapim ol sampela kain ples olsem ol buai kefe, wankain olsem haus kai, we ol lain i ken go kaikai buai, spet, klinim maus na go bek long wok o skul.

"Dispela pasin i no hat. Ol kantri long Esia olsem Taiwan, Malaysia, Singapo na Saina i bin mekim dispela pinis.



Gavana Powes Parkop.
Foto: Frieda Kana

18 kendidet resis long Madang bai ileksen

BIHAIN long rits bilong Madang Open bai ileksen i bin pas long las wik Trinde 18 kendidet i givim nem long resis nau long dispela sia bilong nesenel palamen.

Wanpela narakain samting tu i kamap we i lukim tupela kendidet husat i resis long arapela distrik nau i putim nem long resis long Madang Open. Tupela long ol dispela lain em olpela memba bilong Goroka, Thompson Harokaveq na bisnismen na olpela memba bilong Usino Bundi, Peter Yama.

Mista Yama i resis long Usino Bundi long las yia jeneral ileksen, na Mista Harokaveq i sanap long Goroka Open.

Mista Yama i tokaut olsem tingting bilong em long sanap long Madang Open bai ileksen i kamap bihain long wanpela strongpela lida bilong Madang Sir Angmai Bilas bilong Rivo viles klostu long Madang i tokaut olsem no gat kendidet bilong 'Bel tokples' eria i sanap long bai ileksen. Mista Yama i toke m i mas karim nem na makim ol long bai ileksen.

Long apinun long Septemba 25, lista bilong ol kendidet i kamaut bihain long fainol nominesen i soim ol kendidet em Christopher Papiali, Fene Lato, Michael Baniau, Harokaveq, Peter Memafu, Joseph Mocke, Stanley Pil, Brian Kramer, Dudau Ura, Dokta Salam Malagun, Alois Golu Kingsley, Clant Alok, Nixon Philip Duban, Dokta Charles Kalana, Buka Goli Malai, Max Kitau, Elvis Lang na Peter Yama.

Mista Yama husat em lida bilong Pipols Leba Pati (PLP) i soim stret kala bilong em taim em i go long nominet long las wik Tunde wantaim ol yangpela man i ron i go pas na bringim em long baisikol o wilwil i go long opis bilong PNG Ilektral Komisin. Long wankain taim tu, Alois Kingsley i muv wantaim ol lain sapota bilong em na rot long Modilon i go long taun i bin pas pas tru wantaim ol kar na ol manmeri.

Kempein bilong Madang Open bai-ileksen bai ran inap 4-pela wik. Poling o taim bilong vot bai stat long Novemba 15 na pinis long 21. Planti long ol dispela kendidet nau i wok long raun na mekim strongpela kempein bilong ol long rurel eria long Madang distrik na tu traim long pulim moa sapot insait long taun na ol setelmen eria.

grow business
Banking solution for SMEs

Smart Business Package

- ✓ Smart Business Current Account
- ✓ Smart Business Deposit Account
- ✓ Smart Business Debit Card
- ✓ Mobile and Internet Banking

Plus Smart Business Loan

320 1212 / 7030 1212 - 24/7
 servicebsp@bsp.com.pg
 www.bsp.com.pg | f t

BSP
 Official Sponsor of the 2015 Pacific Games

Ol pilaia givim soim rispek long ol meri skul

Michael Novingu i raitim

Pasin bilong paitim na bagarapim meri i kamap moa long Papua Niugini. I no gat rispek long ol yangpela na ol mama bilong yumi i lukim bagarapim i kamap long sindaun long ol komyuniti.

Long displa as na ol pilaia bilong Kumuls Praim Minista 13 na ol Australaia Kangaroo i bin mekim bikipela wok long Kokopo las wik Sarere long tokim ol pipel long soim rispek long ol meri. Het tok bilong awenes em, ol trupela man i mas soim rispek long meri. (Real man respect girls).

Samting olsem 4,000 manmeri i pulap kapsait long Kokopo Sekendori skul long lukim ol pilaia bilong PNG Kumuls na ol Australian Kangaroos i toktok long ol sumatin bilong ol skul long Is Niu Briten long rot bilong pilai ragbi.

Ol sumatin bilong Vunapope Intanesenel skul, Kokopo praimeri skul, Rakunai, Vunakanau na ol arapela skul sumatin long Is Nu Briten i bin kam we strongpela pilaia bilong Parramatta Eels Jarred Haynes na tupela Morris brata, na James Tamau i lanim ol sumatin krismas bilong ol i stat long faiv na

i go antap long rot bilong pilai ragbi.

Ol dispela sumatin i amamas tru long lainim pasin bilong kamap strongpela ragbi pilaia long bihaintaim.

Tupela strongpela Kumuls pilaia tu i stap long lainim ol yangpela sumatin.

Tupela man ya em Lasen Marabe na Israel Eliab. Tupela tu i gat sapota bilong tupela long taim tupela i pilai ragbi.

Tupela olpela Kumuls pilaia, Steve Malum na Arnold Krewanty husait I save seletim ol Kumuls pilaia i bin stap tu long trening bilong ol yangpela.

Bihain long dispela trening, Jarred Haynes, James Tamau, Greg Bird i wokabout bihainim banis waia long long sekan long ol manmeri i stap autsait.

Planti manmeri save lukim ol dispela pilaia olsem Jarred Haynes, James Tamau na Greg Bird long TV tasol, na nau ol i lukim stret na tasim skin bilong ol.

Dispela tripela Australia ragbi pilaia i tok pilai ragbi i kamap bikipela samting long Is Nu Briten na long Papua NiuGini tu. Ol tripela pilaia ya i amamas long gutpela pasin ol pipel bilong Is



PM 13 Kumul pilaia, Israel Eliab, (long navel) i wanpela long ol lain i givim skul olsem strongpela man i no ken paitim meri, i go long ol yangpela meri na pikinini. Poto: Nicky Bernard

Briten i soim long ol.

Long dispela as James Tamau i rausim siot bilong em na givim long wanpela bilong ol lain i sanap arere long banis waia. Na wanpela man i rausim kep bilong Greg Bird long het bilong em.

Bihain long trening, kosa bilong Australia Kangaroos Laurie Daley i givim toktok long ol manmeri i kam bung long Kokopo sekonderi skul long soim rispek long ol meri na no ken paitim ol.

Laurie i tok olsem ol meri i gat

laip olsem man na ol tu i stap long komyuniti long sapatim sindaun bilong yumi long komyuniti.

Em i tok yumi mas rispek long ol meri na no ken bagarapim ol.

Long wankain taim tu, ol arapela pilaia bilong Kumuls na Kangaroos i go lukluk raun long Kokopo polis stesin, St Mary Haus sik Vunapope. Dispela wokabout bilong ol i hap bilong awenes long soim rispek long ol meri.

PM tokaut long plen long wokim nambis haiwe bungim Raikos na Morobe

PLANTI pipel bilong Raikos distrik long nambis i amamas long toktok bilong Praim Minista, Peter O'Neill olsem i gat plen long wokim wanpela rot long bungim ol longwe ples lain bilong Morobe na Raikos long Madang wantaim wanpela haiwe rot bihainim nambis.

Tasol wanpela mausman ples Bandid klostu long Saidor stesin, Soge Dilambe i tok dispela plen o toktok i mas kamap tru na no ken politiks tasol.

Praim Minista O'Neill i bin mekim disp-ela toktok bilong rot long taim em i tok tok long FM 100 Tok Bek So. Praim Minista i tok planti pipel bilong Raikos nambis na ol lain i go olsem long Morobe i save painim taim tru.

Em i bin bekim askim i kam long wanpela meri Madang husat i tokaut long bikipela hevi bilong transpot ol pipel bilong Raikos stat long Marakum i go olsem long Saidor stesin na go moa yet long Gali long boda

bilong Morobe na Madang i save bungim.

Em i tok Raikos em wanpela ples we i gat planti salens tru long em askim olsem em ples we bikipela Ramu NiCo main projek i stap long en.

Mista O'Neill i tokaut olsem taim em i bin stap Tresera o minista bilong lukautim mani, em i bin tokorait long mani long wokim haiwe bai i bungim Raikos i go olgeta long Madang. Tasol dispela i no kamap. Olsem na nau em lukluk long toktok wantaim Spika bilong Nesenel Palamen, Theodor Zurenuc long kirapim haiwe long Morobe i kam olsem long Raikos na go olsem long Madang.

Wanpela komyuniti lida bilong Raikos, Sabi Andrew bilong Saidor LLG, i tok em i wanbel tru long tingting bilong Mista O'Neill na em i laikim gavman na Task Fos Swip tim i mekim wok painimaut i go insait long mani ol i givim long wokim Raikos haiwe tasol no gat wok i kamap. Mista Andrew i tok

Raikos i gat planti ol bikipela riva i stap klostu long bikipela Finistia Maunten i karamapim hap bilong Morobe na Madang na taim bilong bikipela ren ol bikipela riva i save tait

strong tru. Olsem na wanpela gutpela ovasis kampani husat i gat save long wokim gutpela na strongpela bris i mas kisim kontrak long mekim wok.

Em i tok dispela Madang-Saidor rot

bipo i save sevim ol manmeri long ol viles na hauslain long nambis long 1970s na 1980s. Tasol bihain long planti ol bris long ol bikipela wara i bin bruk, no gat tenis bilong ol na ol kar na

trenspot long go kam long kisim sevis long rot i stop olgeta.

Ol manmeri nau i yusim ol lokal moto bot tasol mani bilong baim i go kam long taun em i antap tumas.



MANUGORO PLES KISIM LUKSAVE: Wanpela liklik ples long Rigo viles long sentral provins kisim luksave long spots. L-R 2015 Pasifik Gems CEO, Peter Stuart i givim ol presen i kam long meja sponsa BSP, i go long Spots Siaman bilong Manugoro, Enaha Kila. **Lukim stori long pes 5.** Poto: Frieda Kana.

OTML toktok go kam yet

OL toktok long gavman i tekova long Ok Tedi Main long Westen Provins i go het yet wantaim sampela i sapatim na ol arapela i agensim.

Long ol ripot, Praim Minista Peter O'Neill i tok Taskfos Sweep bai go pas long karimaut wok painim na moa yet long eria we PNG Sas-tenebol Dvelopmen Progre (PNGSDP) i kisim ol konsalten long bikipela pe, na tu, rot we BHP, kampani we i bin papa bilong Ok Tedi Main i bin go aut. Mista O'Neill i tok wok painim bai lukim sapos gavman we Sir Mekere Morauta i bin go pas long en i bin bihainim o brukim lo long lusim BHP i go wantaim no gat asua long ol bagarap maining i kamapim long envairomen long Westen Provins.

Pinisim ABG Palamen

klak:

OL i pinisim klak bilong Otonomes Bogenvil Gavman (ABG) Palamen, Robert Tapi long wok bilong em. Ol ripot i tok ABG Spika, Andrew Miriki, i pinisim Mista Tapi long wok bikos em i no bihainim sampela daireksen bilong spika. Mista Tapi i holim dispela wok stat yet long 2005 taim ABG i bin kamap.

PNGEC gat bikipela dinau long Bogenvil

BOGENVIL i gat moa long K2 milien dinau mani yet i kam long PNG Iektorel Komisn long ol lain i bin givim sevis bilong ol long 2012 nesenel ileksen, ol ripot i tok. Dinau bilong PNGEC i bilong ol bisnis, na ol man we i bin wok long taim bilong t ileksen na kaunim ol vot.

Ol ripot i tok dispela inap kamapim hevi long ileksen ol bai wokim long 5-pela sia bilong ol konstituensi i go log ABG long pinis bilong dispela mun.

Ekting Bogenvil Iektorel Komisina, George Manu i askim ol pipel na moa yet, ol dispela i no kisim mani bilong ol yet long noken wokim trabel long taim ol ABG ileksen i kamap.

Laik givim gutpela sevis

HELT sevis, ol rot, hevi long graun, lo na oda na solwara na rot sefti em sampela long ol eria we Peter Memafu, wanpela kendidet long Madang Open bai ileksen bai lukluk long stretim. Mista Memafu i bin wok olsem dairekta bilong Melanesian Faundesens, wanpela Non Gavman Ogenaisens long Madang i save helpim ol helt na edukesen sevis long ol rurel eria bilong Madang. Em bin kisim Logohu luksave awot long 2009 long kontribusen bilong em i go long komyuniti na pipel long Madang.

Mista Memafu i tok em i laik skruim wok long kisim ol sosel na developmen sevis i go long ol pipel bilong Madang, tasol olsem wanpela lida long dispela taim.

Long wankain taim, Mista Memafu i laikim bai ol lida i stopim pasin bilong birua long ol ileksen petisen na wok bung wantaim long kisim sevis i go long pipel, na developim Madang.

2015 Pasifik Gems bungim Rigo Komyuniti

Frieda Sila Kana i raitim

WANPELA ples long Rigo Distrik, Sentral Provins i amamas long lukim 2015 Pasifik Gems Ogenaising Komiti opisa i go long tok-save long kamap bilong ol gems long 2015.

Bikpela ples Manugoro, em i Wod 1 bilong Hiri Wes LLG na i karamapim tripela ples, Manugoro, Sabuia na Senunu. Long dispela ples ol i no bin save tumas long wanem rot ol i ken kam insait long 2015 Pasifik Gems.

Lawrence Martin, Komyuniti Rilesens Opisa i bin kisim singaut i kam long ol lain long ples na bihain dispela wokabout i kamap. Peter Stewart, Sif Eksekutiv Opisa (CEO) bilong gems wantaim famili bilong em, Ken Siminj, Maketing Menesa na ol nius lain, i bin go long las wik Sarere, 28 Septemba.

Kibung i stat long bikples Manugoro wantaim prea bilong Sekreteri bilong Yunaitet Sios, na welkam toktok i kam long memba bilong Wod 1, Vaura Inara.

Manugoro wod i gat 2000 populesen. Kaunsila, Inara i tok, ol tripela ples insait long Wod 1 i save ranim spots inap long 10 yia nau tasol ol i no save go ausait long ples long distrik o provins. Olsem na dispela kamap bilong Gems ogenaising komiti em bikpela sans tru long ol i kisim luksave long 2015 Pasifik Gems Ogenaising komiti.

CEO Peter Stewart i mekim luksave long 1991 Pasifik Gems, tasol em i tok dispela em i bin liklik, tasol nau dispela gems long 2015, i kamap 24 yia bihain em bikpela moa i winim Olimpik Gems.

Em i tok, dispela gems bai i lukim 4000 ol man meri bilong pilai insait long 28 kain kain gems na bai i gat moa long 2000 ol visita na 5,000 manmeri i wok long gems. Bai i gat 40 eria bilong wok na wanpela hotel bilong slip i gat 4,000 bed, em i winim olgeta hotel long Mosbi, bungim wantaim. Ol haus kuk bai i givim 20,000 kaikai long wan wan de, 300 bas bai karim ol lain i go i kam long pilai na wok, na 65 ton pipia bai i kamap olgeta de bilong klinim long ol ples bilong pilai na olgeta narapela hap bilong gems. Olgeta samting bai kamap insait long tupela wik tasol.

“Em i wanpela bikela projek tru, yumi ken tok i wankain olsem ol maining projek. Olgeta pasifik na olgeta spot wol bai i putim ai long PNG long dispela tupela wik,” Mista Stewart i tok.

Opis bilong 2015 Pasifik Gems nau i gat 25 wok lain i stap. Bikpela wok bilong 2015 gems em ol kontrakta bai wokim. Ogenaising komiti bai nidim 2500 volantia long mekim kain kain wok. Mista Stewart i tok tupela bikpela samting bai i kamap long ol volantia. Namba wan em bai ol i

wok hat tru, na namba tu bai ol i ken kisim gutpela ripot long CV o stori bilong wok bilong ol long kisim wok bihain taim.

Mista Stewart i tok moa olsem ol bai salim 300,000 tiket bilong lukim ol kain kain gems long liklik fi tasol.

“I no bilong mekim profit, tasol mipela i laik sasim get fi olsem ol man bai i no ken go nating na bagarapim ples,” Mista Stewart i tok.

“Bai i gat sampela pilai em i fri long ol i go lukim olsem sel kanu, gems rilei na ol bai putim ol laip TV skrin long planti hap bilong Mosbi na wan wan o tu tu long ol arapela provins na taun tu,” em i tok.

“No ken larim dispela sans i abrusim yu na bihain bai yu sori olsem watpo na yu no mekim sampela samting long stap insait long gems. Planti i save mekim olsem long ol narapela hap bilong wol,” Mista Stewart i tok.

“Dispela kain samting bai i no nap kamap gen long sampela taim yet. Wankain olsem bipo 24 yia i go pinis long 1991 dispela kain pilai i kamap. Olsem mi tok olgeta Papua Niugini i mas painim wanem kain we ol i ken kam insait long mekim dispela gems i kamap wanpela kain taim we bai ol lain i pilai na olgeta wol na komyuniti i no nap lusim tingting long em longpela taim yet bihain,” em i tok.

Salim asailam sika i go bek

“HUSAT i kisim ol asailam sika i kam? Bilong wanem na ol i kam long PNG? Wanem kantri i gat laik long kisim ol na ol i lusim ples bilong ol na i kam? Em askim bilong mi olsem wanpela papa bilong Mama Lo bilong dispela kantri o nogat?” Sir Matiabe i tok.



Sir Matiabe Yuwi, KBE

Wanpela senia stetsman bilong kantri, Sir Matiabe Yuwi i autim bel hevi bilong em long ol asailam sika i kam long PNG.

Em i tok, em i save long olgeta 800 tok ples na kalsa bilong PNG bilong wanem long taim bilong redim Mama Lo bilong kantri, em wantaim konstitusenel plening komiti ol i bin raun long olgeta hap bilong kantri.

Nau em i gat bikpela askim long husat tru i tok na ol asailum sika i kam long PNG. Sir Matiabe i kolim ol asailam sika, “ol paul man.”

“Dispela nem asailam sika i kam long we? Mipela i no save long wanpela dispela kain nem long bipo. Mi yet mi laik kolim ol, ol paul lain. Ol i no gat graun na no gat ples na i paul nabaut,” em i tok.

“Dispela hevi bilong asailam sika i kam long we, Australia, Esia o Pasifik? PNG yet i gat laik long lukim nupela developmen bilong wanem kantri bilong mipela em i yangpela tru, 38 yia tasol em i kisim independens.

i kisim ol asailam sika i kam? i gat sampela gutpela samting bai kam long kisim asailam sika i kam o nogat?

Bipo mipela i no save long dispela nem, asailam sika. Sapos dispela em i laik bilong Australia, orait ol i mas putim ol long Australia. Bilong wanem, Australia i gat bikpela graun, PNG i no gat bikpela graun.

“Australia, yu gat bikpela graun na yu mas holim ol long hap. Bilong wanem na yu salim ol i kam long hia? Mi, olsem senia stetsman, mi laikim Australia bai bekim tok bilong mi. Na bilong wanem, na Papua Niugini gavman i tok orait long dispela samting? Wanem helpim i kam wantaim dispela samting?”

“Ol dispela lain bai i no nap long helpim yumi. Ating bai mi tok pisin olsem, Ol i laik kam long kilim ol Manus pipel na ol i kisim ol i kam? Mi laikim gavman bilong O’Neill-Dion i mas rivesim gen wanem disisen bilong ol. Ol i kam fowod pinis, orait nau mi laik tokim ol long rives i go bek.” Em i tok moa.

“Mi olsem wanpela senia stetsman na man i statim Mama Lo bilong PNG, mi laik advaisim O’Neill-Dion gavman long ol i mas salim ol asailam sika i go bek. I no gat wanpela hap bilong mama lo i givim tok orait bilong dispela kain wok bai kamap,” Sir Matiabe i tok.

Kaikai projek i helpim ol fama bilong Lake Kutubu

WANPELA tripela yia fud (kaikai) sekyuriti projek em Nesanel Egrikalsa Risets Institut (NARI) na kampani Oil Search Limited (OSL) i bin kamapim long Lake Kutubu eria, Sauten Hailans i wok long helpim gut planti fama long hap.

Aninit long wanpela Memorendum ov Agrimen (MoU) tupelalain ya i bin sainim long las yia, 2012, dispela projek bai helpim ol fama i kisim trening long lukautim ol laipstok na krop prodaksen o ol kaikai.

Long 2011, OSL i bin wokim wanpela wok painimaut long ol ples klostu long Lake Kutubu na ol eria klostu we i luksave long ol samting komyuniti i laikim trening na ol bai stap seif long ol kaikai.

Populesen o mak bilong manmeri long Lake Kutubu eria i wok long go antap na dispela i mekim na ol pis long wara na ol abus long ol bus i wok long go daun stret. Rot bilong kisim mani long ol kaikai, ol abus bilong wara na bus i no gutpela nau.

Lake Kutubu em i wanpela bikpela raunwara i stap long bikples long Nipa Distrik, Sauten Hailans.

Em i stap 800 mita antap long level bilong solwara na longpela bilong en em 20 kilomita na brait bilong eni olsem 5-pela kilomita. Namel long 5,000 na 6,000 pipel i save stap long 9-pela viles klostu long Lake Kutubu.

Ol pipel i save kisim kaikai na mani long painim pis bilong famili i kaikai, na tu long salim, na ol i wokim gaden klostu long Lake.

Long taim bilong tumbuna yet i kam, saksak na pis em kaikai bilong ol pipel, na tude tu, ol pipel i save go painim ol wel abus na kaikai olsem long taim bipo.

Bikos populesen i wok long gro bikpela, ol pipel i luksave long ol hevi dispela samting i kamapim.

Na nau ol i laik senisim tumbuna stail rot long mekim ol samting na bihainim rot we bai helpim ol i lukautim gut ol samting na long wankain taim, long helpim sindaun bilong ol.

Tru, i gat sampela senis long

pipel i yusim ol enimal long wok na ol krop long eria.

Tasol ol dispela senis em ol narapela lain i bringim i kam, olsem ol meri bilong ausait i go marit long Lake komyuniti.

Ol eria we Lake komyuniti i laikim trening em, pasin bilong lukautim ol kakaruk, pato, pik (haus bilong ol), maritim ol enimal wantaim narapela kain long kamapim moa gutpela kain na ol kaikai bilong enimal), enimal helt kea, wokim gaden, menesim graun na em bai gat ol gutpela kaikai yet long yusim ol kompos o larim ol pipia i sting na yusim, planim wanpela krop na bihain long en, planim narapela kain krop gen na kontrolim ol gras na

diwai nogut i gro insait long gaden.

Long dispela yia, 20 modol fama i bin sindaun long wanpela wik trening woksop we ol bin skul long ol samting long klasrum na tu, ol i go ausait long fil wok na demonstresen o yusim save ol i lainim long mekim stret wok.

Long ol krop demonstresen, ol fama i bin skul long planim ol taro, yam, banana, redim ol neseri, trensplenting, menesim graun, ol pawa poin presentesen na ol video long rot bilong tanim ol pipia na yusim olsem fetelaisa, laipstok, kontrolim ol binatang i save bagarapim ol kaikai na ol diwai na tu, kontrolim ol sik.

<h2 style="text-align: center; margin: 0;">BEYOND BOUNDARIES</h2> <h3 style="text-align: center; margin: 0;">SUNDAY, 6PM - 6.30PM</h3> <p style="text-align: center; margin: 0;">Topic of the week:</p> <h2 style="text-align: center; margin: 0;">Buai Ban in Port Moresby</h2>	<h1 style="font-size: 2em; margin: 0;">FM100</h1> <p style="font-size: 0.8em; margin: 0;">PNG's Information & Music Leader</p>
--	--

Text 1610

ALOTAU 107.1	BUKA 106.8	KARKAR 100.5	KIUNGA 100.3	LORENGAU 100.3	MT. DINODIMO 107.1	NAMATANAI 100.3	RABAUL 100.9	TINFUTZ 106.8
AMBUNTI 100.8	DARU 100.5	KANDRIAN 100.1	KUTUBU 100.2	MADANG 100.8	MT. HAGEN 100.3	NCD 100.3	RAMU 100.3	TOLUKUMA 100.1
ANGORAM 100.8	DREIKIRKIER 100.8	KEREMA 100.8	LAE 100.5	MARPIK 100.3	MT. HOREATOVA 107.5	NUKU 100.3	TASURIL 100.3	WATERHOLES 107.1
ARAWA 100.3	FINSCHHAFEN 100.4	KIKORI 100.5	IAGIFU 100.2	MARKHAM 100.5	MT. KAINGUMA 107.1	PALMALMAL 100.8	TARI 100.5	WAW'BULOLO 100.8
BOGIA 100.5	GOROKA 100.2	KIMBE 100.3	LHIR 100.3	MT. SOREGORO 107.7	MT. TURU 100.8	POPONDETTA 100.5	TELEFOWIN 100.3	WEWAK 100.8

Australia, PNG i kamapim gutpela rurel helt kea

Ol ples lain bilong Josephstaal LLG long Madang nau i ken kisim gutpela lukaut na helpim long helt senta klostu tasol long ol.

Gavman bilong Papua Niugini na Australia aninit long PNG-Australia Insentiv Fan i givim mani bilong mekim dispela wok na luksave i kamap taim ol i opim nupela wok helt senta long Fonde 19 September.

Hai Kominisa bilong Australia long PNG, Deborah Stokes i opim dispela helt senta, aninit long Madang Provins Katolik Helt Sevis infrastraksa apgret projek.

Wantaim wok bilong haus sik, ol i bin kirapim tu haus bilong ol wok lain na sampela etpos. Insait long helt senta, ol putim wanpela wok bilong ol pikinini, wanpela bikpela wok bilong ol sik lain na administre-

sen opis. I gat 9-pela ples i stap wantaim haus bilong ol wok lain na ol ed pos.

Josephstaal em i stap longwe tru insait long bus bilong Madang na i no gat gutpela rot i go. Ol balus i bin stop long go inap nau dispela projek i helpim long opim gen ples balus. Nau ol i stretim rot tu tasol ol i ken yusim tasol long taim i no gat ren.

Mis Stokes i tok, planti pipel insait long Josephstaal nau i ken kisim gutpela helt kea.

"PNG i gat bikpela nid long helt. Ol bebi i gat liklik sans tasol long ol i ken kisim 5-pela krismas na namba bilong ol meri i save dai long taim bilong karim em i winim ol arapela kantri long Esia Pasifik," em i tok moa.

"Dispela haus sik bai helpim long kamapim moa klinik sevis bi-

long lukautim helt bilong ol mama na ol liklik pikinini.

"Ol meri bai i gat gutpela ples bilong karim pikinini na bai ol helt wok lain i lukautim ol gut. Bai i gat ol gutpela haus slip bilong ol wokman na meri tu i kamap long mekim ol gutpela helt woka i laik wok long ol rurel haus sik na klinik.

"Wantaim Katolik Helt Sevis, mi tu laik tok amamas long ol lokal komyuniti long kirapim ol dispela haus sik," Mis Stokes i tok.

Asbisop Stephen Reichert i helpim long plenim dispela projek wantaim helpim bilong ol komyuniti bilong Josephstaal.

Katolik Helt Sevis Helt Progrem Menesa, Patrick Angrai i tok ol komyuniti i bin katim bus na klinim ples bilong kirapim ol haus, karim ol ston na wesana na wokim ol liklik haus bilong ol kapenta na givim kaikai long ol tu.

"Mi mas mekim klia olsem, Katolik Helt Sevis projek tim i no bin baim ol komyuniti long mekim dispela wok. Ol i bin givim han nating," Mista Angrai i tok.

Ol haus sik na haus bilong wok lain long Josephstaal i pinisim wok i kamap aninit long K7.9 milien i kam long PNG-Australia Insentiv Fan, bilong helt infrastraksa we Ka-

tolik Helt Sevis i wokim long 4-pela distrik bilong Madang. Ol i bin wokim 25 haus bilong wok lain na 11-pela etpos insait long olgeta 4-pela distrik aninit long dispela mani.

Australia i givim K230 milien long strongim PNG helt sistem long dispela yia. Em i helpim long baim gutpela marasin na ol helt saplai, trenim na kamapim gutpela namba bilong ol woklain na long kamapim gutpela ol helt infrastraksa.

Long yia 2000, i kam aninit long PNG Insentiv Fan, Australia i givim pinis K350 milien long wok bilong kamapim gutpela helt sistem long kantri.

Digicel winim 62 klasrum nau

HENGANOFI Distrik long Isten Hailans i lukim wanpela moa klasrum i kamap long Maun Kuru Praimeri Skul, insait tru long bus. Digicel Faundesen i bin helpim long sanapim dispela klasrum.

Dispela klasrum i bringim namba bilong ol klasrum Digicel i givim long ol komyuniti long PNG, i go antap long mak bilong 62 olgeta. I gat tupela klasrum wantaim 20 des na wanpela opis bilong tisa long namel. Em i gat sola lait long olgeta rum. Projek i kam wantaim wanpela 9000 lita wara tenk, tupela waswas rum i gat baket sawa na tupela VIP toilet i gat paip bilong rausim smel na gutpela sit. Mak bilong mani ol i spendim long olgeta samting em K140,000.

Siaman bilong skul, Timothy Joffa, i tok amamas long Digicel Faundesen long givim tupela klasrum long skul bilong ol.

Em i tok, "Dispela strongpela ain klasrum em i nambawan tru long Maun Kuru Praimeri Skul. Digicel Faundesen i soim ol pikinini bilong mipela olsem, skul em i bikpela samting, na taim ol i putim mani i go long ol rurel ples, i soim olsem ol i gat bilip olsem edukesen i bringim gutpela samting maski ples i longwe tumas na i stap long bus."

Digicel Faundesen CEO i tok, "Maun Kuru Skul Bot, ol tisa wantaim komyuniti lida i sapatim singaut bilong skul. Mipela long Digicel Faundesen i holim pas gutpela pasin bilong yupela long wok bung, wantaim bel kirap long kamapim gutpela rot bilong ol pikinini bilong yupela. Edukesen i save redim ol pikinini long kain kain rot i stap long wol na olsem mipela tenkyu long stap patna long dispela projek.

Em i namba tri dabol klasrum Digicel i putim insait long Henganofi Distrik na i kamapim 9-pela projek insait long Isten Hailans provins.

Maun Kuru Praimeri Skul i stap 600km saut long Goroka antap long ol lain maunten i brukim Okapa na Henganofi Distrik.

Ol i bin kirapim dispela skul long 1998, na em i gat 4-pela ol bus haus klasrum tasol na wanpela haus kapa. Ol komyuniti i bin painim hat tru long wokim ol nupela klasrum olsem long bikpela namba bilong pikinini i kam insait.

Ol hetman bilong Maun Kuru i bin harim long helpim bilong Digicel Faundesen long wanpela lons bilong Bipi Praimeri Skul long Morobe Provins.

Olsem na wantaim helpim bilong ol wokman bilong Digicel PNG long Lae, ol tisa na bot bilong Maun Kuru i kisim dispela projek nau i karim kaikai.



Asbisop Stephen Reichert i holim kamera na Mis Deborah Stokes i wokabaut long sait bilong em long taim bilong opim ol haus sik long Josephstaal.



Nupela klasrum i op long Maun Kuru.

AGRICULTURE TRACTORS

- Slashers
- Disc Ploughs
- Disc Harrows
- Post Hole Augers
- And Other Attachments for Farming

AGMARK MACHINERY

PORT MORESBY: 323 7957 | Digicel: 7215 0333 / 7217 9815
 LAE: 472 6324 KOKOPO: 982 8748 | email: machinery@agmark.com.pg

NASFUND FM100 TALKBACK SHOW

MONDAY - FRIDAY, 9AM TO 12PM

FM100

PNG's Information & Music Leader

Studio: 323 3777 or 323 3999

ALOTAU 107.1	BUKA 100.8	KARKAR 100.5	KIUNGA 100.3	LORENGAU 100.3	MT. DIMODIMO 107.1	NAMATANAI 100.3	RABAU 100.8	TINPUTZ 100.8
AMBUNTI 100.8	DARU 100.5	KANDRIAN 100.1	KUTUBU 100.2	MADANG 100.8	MT. HAGEN 100.3	NCD 100.3	RAMU 100.3	TOLLUKUMA 100.1
ANGORAM 100.8	DREIKIRKIER 100.8	KEREMA 100.8	LAE 100.5	MAPRIK 100.8	MT. HOREATO 107.5	NUKU 100.8	TABUBIL 100.3	WATERHOLES 107.1
ARAWA 100.3	FINSCHHAFEN 100.4	KIKORI 100.5	IAGIFU 100.2	MARKHAM 100.5	MT. KAINGUMA 107.1	PALMALMAL 100.8	TARI 100.5	WAUBULOLO 100.8
BOGIA 100.5	GOROKA 100.2	KIMBE 100.3	LIHIR 100.3	MT. BOREGORO 107.7	MT. TURU 100.8	POPONDETTA 100.5	TELEFOMIN 100.3	WEWAK 100.8

Katolik Sios bai lukim tupela santu neks yia



SANTU MAN: Pope John Paul 2

NEKS yia Epril 27, 2014 bai Katolik Sios i wokim seremoni bilong santuim tupela biknem lida bilong ol.

Ol ripot i kam long Vatiken i tok hetman bilong Katolik Sios long wol, Pop Francis long dispela wik i tokaut olsem sios bai givim luksave na santuim Bleset John Paul 2 na Bleset John 23.

Misa lotu bilong santuim tupela bikman bai kamap long Sande, Epril 24 long Rom.

Pop Francis i tok dispela em i gutpela de long wokim dispela misa lotu seremoni bikos em i Divine Mercy Sande na

namba 2 Sande bihain long Ista.

Long mun Julai, Pop Francis i bin givim luksave long namba tu mirakel we i tok oraitim rot bilong santuim Bleset John Paul 2. Mirakel i kamap long wanpela meri bilong Kosta Rika long Saut Amerika i gat sik kensa long kru, tasol long Me 1, 2011 em de we ol bin wokim lotu seremoni bilong luksave long John Paul 2 olsem Bleset, sik meri i bin kamap orait.

Wanpela bikpela samting i wankain long tupela Bleset John Paul 2 na John 23 em

laip, stap na sindaun bilong ol em daun pasin i stap wantaim ol.

Bleset John 23 i kamap long wanpela bikpela na tarangu famili we pasin bilong pre na daunpasin i bin stap strong long laip bilong em.

Wankain tu long Bleset John Paul 2 husat i bin stap insait long hevi bilong Wol Woa 2 taim Nazi Jermani i bin tekova long kantri bilog em, Polan.

Tu, maski tupela bikman i sik na ol i stap long hevi na pen, ol i strongim prea taim, wok na laip bilong ol.

Sempion bilong jenda ikwaliti

I gat 30 wokman bilong gavman nau i kisim nem, 'sempion bilong jenda ikwaliti' aninit long program bilong AusAID, long daunim ol pasin bilong vailens long ol meri.

Ol i kam long 19 gavman dipatmen na ol i givim ol yet long mekim wok bilong stopim pasin bilong paitim ol meri. Ol i laik soim gutpela piksa na tokaut insait long wokples na ol komyuniti bilong ol.

Ol i sainim wanpela tok promis olsem ol i luksave long as bilong vailens long ol meri, em mak bilong ol man na meri long sosaiti i no save wankain. Ol i tok strong long bai ol i pait long ol meri na man i mas gat wankain rait na ol bai kamapim wanpela lain bilong senisim pasin bilong ol man.

Dipatmen bilong Pesonel Menesmen i kamapim wanpela kibung bilong ol man insait long pablik sevis husat i laik toktok long helpim ol meri, wantaim mani i kam long Australia aninit long iekonomik na Pablik Sekta Program.

Dipatmen Sekreteri, John Kali i tok ol man i gat bikpela wok long sanap long strongim na tokaut long daunim pasin

bilong paitim na bagarapim ol meri.

"Em i taim nau long ol man i mas sanap na stopim pasin bilong bagarapim ol meri long pasin pamuk, bagarapim mani bilong ol na long bagarapim bel na sindaun insait long ol famili na komyuniti bilong ol," Mista Kali i tok.

"Olsem na Nesenel Pablik Sevis i mas soim lidasip long senisim pasin na tingting bilong ol man insait long wok ples, na long ples sevis."

Nesenel pablik sevis i gat 91,000 ol wokman na meri long kantri.

Hetman bilong AusAID long PNG, Stuart Schaefer i tok advokasi program em i soim strongpela PNG lidasip na eksen kantri i nidim long daunim olgeta pasin bilong paitim na bagarapim ol meri.

"I gat planti moa samting i mas kamap long stopim ol pasin na kastom nogut i save daunim na bagarapim ol meri na long save gut long wanem as na ol man i save laik paitim na bagarapim ol meri long kain kain pasin," Mr Schaefer i tok.

"Ol meri i mas stap insait long ol hap we ol i no gat birua

na bai ol i ken wok long helpim komyuniti long groim ikononi," em i tok moa.

Wanpela senia mejistret bilong Mendi Distrik Kot, John Kaumi i wanpela bilong ol maus man bilong helpim ol meri. Em i bin kisim trening bilong em long Fiji Wimen Kraisis Senta na em i sainim wanpela tok promis long mekim samting long rausim vailens egens ol meri long kantri.

"Yumi bai ino inap long senisim pasin insait long wanpela de. Wankain olsem ol i no kamapim Rom long wan de. Tasol em i gutpela, yumi olsem man bilong kamapim senis i mas stat na mekim. Em i mas stat long haus bilong yumi yet wantaim ol meri na famili bilong yumi. Bihain yumi ken traim long senisim sosaiti bilong yumi," Mista Kaumi i tok.

Ol dispela mausman i tok promis long helpim long kamapim wanpela Nesenel Pablik Sevis Jenda Ikwiti Sosal Inklusen Polisi. Ol bai lukluk long wanem hap bilong ol lo na ol polisi na pasin i no gutpela na bai ol i toktok long senisim.

Raun lukim ol meri pikinini



HARIM: OL mama na ol pikinini bilong ples Manugoro long Rigo Distrik, Sentral Provins i sindaun harim ol awenes bilong 2015 Pasifik Gems we komiti i redim ol wok long dispela bikpela pilai bai kamap long PNG log tupela yia i kam i mekim. *Poto: Frieda Kana*

Wewak daiosis wetim nupela bisop

OL Katolik bilipmanmeri bilong Wewak i wet tasol nau long kisim nupela bisop bilong daiosis bihain long Bisop Anthony Burges i risain long dispela wok. Bisop Tony i sik na i go bek long ples bilong em long Australia long kirap bilong mun September.

Bipo long em i go bek long Australia, Bisop Tony i bin salim wanpela pas i go long ol Katolik bilong Wewak Daiosis na tokim ol olsem sik kensa i bagarapim bodi bilong em na em i mas go bek long ples bilong em long Australia. Em i tok long mun Julai long dispela yia em i bin winim 75 krismas, em mak bilong ol bisop i ritai, na em i salim pas long tok save long Pop long Rom olsem bai em i ritai.

Bisop Tony i tok em i laik tru long stap long Wewak inap long Pop i makim nupela bisop bilong Wewak daiosis, tasol sik bilong em i mekim na em i mas lusim PNG. Brata na susa bilong em i bin kam na kisim em i go bek long Australia.

Bisop Tony i tok tenkyu long ol pater, sister, bruder, ol tisa, katekis ol man, meri na pikinini long opis bilong misin husat i bin helpim em long mekim wok bilong em. Em i tok em i amamas long stap long Papua Niugini we em i mekim wok pater inap long 40 yia.

Em i tokim ol pipel bilong Wewak olsem em i lusim ol i go tasol lewa bilong em i stap wantaim ol na bai em i tingim ol long prea.



Yut, Meri na Femili

Pastor Barbara Lunge

God i wokim yu long piksa bilong em yet

God i tok, "Nau yumi wokim ol manmeri bai ol i kamap olsem yumi yet. Bai yumi putim ol i stap bos bilong ol pis na ol pisin na bilong olgeta kain enimal na bilong olgeta samting bilong graun. Orait God i wokim ol manmeri na ol i kamap olsem God yet. God i mekim ol i kamap man na meri. Na God i mekim gutpela tok bilong givim strong long ol. Em i tokim olsem, 'Yupela i mas kamap planti na i go sindaun long olgeta hap bilong graun na bosim olgeta samting i stap long en. Mi putim ol pis na ol pisin na olkain enimal bilong graun aninit long yupela.'" Stat 1:26-28

Tasol Adam na Eva i sakim tok bilong God na i pundaun long sin, olsem na man i lusim mak bilong em olsem bos bilong graun na satan i kisim ples. Tasol God i gat narapela tingting gen long salim pikinini man bilong em, Jisas Kraisis long kam na kisim bek dispela graun wantaim dai bilong em long diwai kruse long Kalvari. Long pikinini bilong meri em Jisas i kamap, long bagarapim wok bilong devel, na long baim bek man i go bek long God.

"Na bai mi mekim yu i stap birua bilong meri, na meri i stap birua bilong yu. Na bai mi mekim ol lain bilong yu i birua long lain bilong meri. Bai ol i krungutim het bilong yu, na bai yu kaikai lek bilong ol." Stat 3:15

Nau long graun yumi save pait wantaim satan na ol lain devel bilong em husat i save birua long ol bilip manmeri na kisim ol i go longwe long God. Olsem na olgeta taim yumi mas stap redi na pre long God i lukautim na lidim yumi.

"Tingim gut. Yumi no save pait long ol manmeri. Nogat. Yumi pait long ol strongpela spirit na ol gavman na ol kain kain samting i gat strong, ol i save bosim graun long dispela taim bilong tudak. Yumi pait long olgeta spirit nogut i stap antap." Efesus 6:12

"... Na Pikinini Bilong God i bin kamap ples klia bilong bagarapim na rausim wok bilong Satan." 1 Jon 3:8 "Lo i bin kotim yumi na kamapim ol rong bilong yumi, na mekim yumi i stap aninit long ol tok na strong bilong en. Tasol God i bin rausim olgeta dispela tok bilong kotim yumi na em i pinisim strong bilong lo na nilim em long diwai kruse bilong Kraisis. Em i pinisim strong bilong ol strongpela spirit na olgeta kain samting i gat strong. Long diwai kruse God i soim olgeta man olsem em i winim pinis ol dispela samting na i mekim ol i kamap olsem samting nating." Kolosi 2:14,15.

"... Nau God bilong yumi em i kisim bek yumi pinis, na strong bilong en i kamap pinis long ples klia, na em i stap king. Na dispela man em i makim bilong kisim bek ol manmeri bilong en, em i kisim pinis bikpela namba na strong. Long wanem, dispela man bilong kotim ol brata bilong yumi em i bin kotim ol long ai bilong God bilong yumi long san na long nait, tasol nau ol ensel i tromoi em i go daun pinis. Ol brata bilong yumi ol i no bin laikim tumas laip bilong ol yet, na ol i no tingting strong long ol i mas i stap gut long graun. Nogat. Ol i bin kisim strong long blut bilong Pikinini Sipsip na ol i strong long autim tok bilong em, maski ol birua i kilim ol i dai." Kamapim Tok Hait 12: 10,11

Sapos yu laik toktok moa o yu nidim prea, yu ken rait long: Evangelis Barabara Lunge, ROGIM, P.O. Box 3063. Boroko. NCD. PNG, o ring long BM 67331426 OR 71075829 DG



Praim Minista Tony Abbott i wokabaut arere long gad ov ona long Indonesia long presiden-sal palas long Jakarta. (Credit: AFP)

Tony Abbott i toktok wantaim Indonesia long ol asailam sika

Praim Minista bilong Australia, Tony Abbott i tok klia olsem em i respektim tingting bilong Indonesia taim em i kamapim polisi bilong ol asailam sika. Na long wankain taim tu, Indonesia i bin tokaut olsem i mas gat moa wok bung namel long tupela kantri long dispela hevi.

Mista Abbott i tok em i bin toktok gut wantaim Presiden bilong Indonesia, Susilo Bambang Yudhoyono long Jakarta long dispela wik.

Presiden Susilo Bambang Yudhoyono i tok orait long wokbung moa long stretim hevi bilong pipel smagling.

Mista Abbott i tok em i bin gat gutpela na klia toktok long "pipel smagling" insait long toktok bilong em wantaim presiden bilong Indonesia Susilo Bambang Yudhoyono long Jakarta.

Mista Abbott i tokim wanpela miting wantaim ol nius lain olsem em bai wok wantaim Presiden Yudhoyono long stretim dispela hevi.

Em i tokim ol nius lain olsem tupela i bin toktok gut long ol samting long Indonesia olsem independen kantri na pasin bilong hait na salim ol pipel i go aut long kantri.

Em i tok Australia i gat bikpela rispek long Indonesia olsem wanpela independen kantri.

Mista Abbott i tok gen olsem tupela kantri i gat bikpela laik long traim pinisim dispela trabel, we em i no kamapim ol kros namel long tupela kantri, tasol planti taim i kamapim wari tu long solowara namel long tupela kantri we ol pipol i kam long bot na i dai.

Na planti long ol dispela toktok bai ol i lusim i stap long moa toktok bai kamap bihain long kodineting sekyuriti minista bilong Indonesia na Boda Proteksen Minista bilong Australia.

Solomon Ailan Praim Minista i laik pasim maus bilong pipel

I gat wari olsem Praim Minista bilong Solomon Ailan i laik bihainim pasin Fiji i save mekim long ranim kantri.

Ol lain bilong join sivil sosaiti grup long Solomon Ailan i sutim tok long Praim Minista olsem em i wok long bihainim pasin bilong militeri Praim Minista bilong Fiji Komado Frank Bainimara long traim pasim maus bilong ol pipel.

Ol i mekim dispela toktok bihain long

tingting bilong gavman long rausim rejista ol sivil sosait memba olsem Forum Solomon Ailan Intensenel, Anti Korapsen Netwok bilong Solomon Ailan na Malaita Ma'asina Forum.

Ol dispela lain i wok long mekim planti toktok egensim korapsen long gavman. Wanpela bikpela tingting bilong ol nau em long kamapim wanpela petisen long praim minista i mas risain nau.

Mista Henson i tok tingting bilong Praim Minista long rausim rejistration bilong ol sivil sosaiti memba em i hap tingting bilong wok politik we em bai pasim maus bilong ol olsem ol i no ken go het wantaim petisen ol i tingting long putim i go long em.

Kapten bilong asailum bot i ranawe

Ol gavman opisa i bilip kepten bilong dispela asailum sika bot em i bin go daun long solwara long Mande nait i ranawe na hait i stap nau. Dispela birua i kamap long solwara long Indonesia.

Ripot i tok kepten bilong sip i lusim ol asailum sika long painim rot bilong ol yet i go long Australia. Samting olsem 22 asailum sika nau i dai na 30 ol arapela lus yet bihain long bot ol i kam long en i bin go daun long solwara long nambis bilong Cianjur long wes hap bilong Java, Indonesia.

Ripot i tok tu olsem samting olsem 120 pipel i bin stap long dispela bot, na planti long ol dispela pipel husat i bin dai long solwara em ol pikinini.

Bodi bilong ol dispela pipel i dai pinis em ol i painim long nambis na narapela 25 pipel is tap laip yet.

Ol asailum sika i bin paul long rot bilong ol. Ol i no save long wanem hap ol i go long en, na dispela i mekim fuel bilong ol i pinis na bikpela si i bin paitim bot bilong ol.

Ol wok painim i no bin isi long wanem resku atoroti bilong Indonesia i no gat ol gutpela samting long helpim wok painim bilong ol long nait na long taim bikpela si i bin kamap.

Bikpela si i mekim na ol i stopim wok bilong painim ol dispela pipel long Sarere moning.

Niusman bilong ABC long Indonesia, George Robert, i bin tokim ABC moning Karen Afeas olsem ol gavman opisa i bilip kepten bilong sip i bin ranawe na lusim sip bilong em.

WOL NIUS LONG POTO



NIGERIA: Boko Haram militen sutim dai 40 sumatin taim ol i silip long Nigeria kolis domatri bilong ol. Poto i soim olsem Boko Haram lida bilong ol militen i wok long tagetim ol skol, yunivesti na ol kolis. (AFP) Ol Islamik paitman i go insait long wanpela kolis domitri long Not-Is Nigeria na sutim nating long sumatin we ol i silip dai. Ol dispela sumatin em ol Egrikalsa sumatin bilong wanpela taun long ples Gujba, 30 kilomita ausait long Damaturu, bikpela capital bilong Yobe Stet. Dispela birua man nem bilong em i Boko Haram long tok ples em, "Westen Edukesen em tambu tru" na em tasol wok long kilim dai ol sumatin tasol.



ROM: John Paul II (R) na John XXIII (L) tupela i stap open wantaim ol pipel long modern-de Katolisim. Ol Pop bilong bipo John Paul II na John XXIII, bai ol i makim ol olsem santu long April neks yia long yunaitim ol konsevetiv na liberal Katolik sios. Pop Francis i mekim dispela bikpela tokaut taim ol kadinel i bung.



BAGDAD: Olsem 54 manmeri i bin dai na moa long 140 i kisim bagarap taim 14-pela ka bom i pairap long hap ples we ol Shiite i stap long en long Bagdad, sekyuriti na medikol tim i tok. Ol dispela kain bom birua i wok long kamap insait long sentral Irak i kamapim planti toktok we ol birua i wok long kamap long ol Sunni-Shiite komyuniti we i bin kamapim bikpela samting long yia 2006 na 2007 we planti tausen manmeri i bin dai. Nau i kamap gen. Dispela ol bom i bagarapim pinis 9-pela eria we 6-pela em ol Shiite bikples na 2-pela em ol Sunni-bikples. Na wanpela em ol miks ples.



AUSTRALIA: Ol Asailum Sika bot i kamap long ples Geraldton, Australia. Moa long 60 Sri Lankan asailum sika manmeri i kamap long ples Geraldton, Western Australia, long Epril. Ol Sri Lankan Tamils i tok bai ol i baim ol lain bilong smaglim ol asailum sika na bai ol i kam yet long Australia. Ol i no kea long nupela polisi bilong Australia gavman long daunim ol asailum sikas. Planti tausen ol Tamil i lusim o ranawe long ples bilong ol bikos long sivil woa i wok long daunim ol na planti bilong ol stap long han bilong birua na kolim ol olsem ol sapota grup bilong Tamil Taiga paitman.

Laip bilong pipel o laip bilong gavman



I gat wanpela moa mun i stap nau bipo long Palamen i bung gen long oraitim baset bilong 2014. Ol memba bai kam bung gen long Mosbi long namba tu wik bilong mun Novemba long mekim dispela bikpela wok. Wanem kain ol gutpela wok bai kisim gutpela skel bilong mani long dispela baset? Bai yumi lukim gavman i skelim gut mani o bai ol i putim ol projek bilong kamapim moa mani i go pas long ol hevi na pen ol pipel bilong kantri i save karim olgeta de, o nogat?. Ating bai yumi wet inap mun Novemba long lukim wanem samting bai kamap.

Na long dispela wik gen moa toktok i kamap long ol sik na haus sik na marasin na ol wokmanmeri bilong haus sik. Praim Minista yet i tok bai i mas gat ples bilong givim trening i go long ol nes na bai kantri i no inap sot long ol dispela namba wan woklain bilong haus sik.

Na yumi harim gen sori stori bilong wanpela kensa haus sik bilong kantri long Lae.

I gat hevi bikos i no gat inap spes na ol wokmanmeri bilong lukautim siklain. Watpo na kantri i gat wanpela dokta tasol bilong mekim wok bilong lukautim ol pipel i gat sik kensa? Watpo na yumi no tingting long givim moa trening long ol yangpela dokta long kisim moa save long sik kensa? Watpo na i no gat ol masin bilong helpim ol siklain long ol haus sik?

Ol dispela askim i stap long tingting bilong ol pipel



long taim yumi ritim stori na harim nius bilong marasin i sot o masin i bruk daun o i no gat dokta o haus sik i bagarap. Kantri i winim 38 yia nau na ol prairoti bilong

yumi i no soim olsem yumi tingim laip bilong pipel.

I gat wanpela skul tasol bilong givim trening long ol dokta bilong yumi. Dispela skul i stap long Mosbi na

long dispela yia ol i bin kisim bagarap long han bilong sampela soldia. Na Difens Fos i stretim bek ol bagarap i bin kamap long dispela skul o nogat? Ating nau em

i taim bilong kirapim wanpela moa kain skul olsem long skulim moa yangpela manmeri long kamap dokta.

I mas gat moa trening skul bilong ol nes na arapela eria bilong helt saiens. Kantri bilong yumi i sot tru long ol kain savemanmeri olsem.

Yumi no inap kisim ol i kam long ol narapela kantri - wanpela rot tasol em long yumi yet i kamapim ol dispela savelain.

Yumi harim pinis long dispela wik olsem sampela bikpela projek bilong gavman i no bin stap long baset bilong 2013. Ol kain samting olsem ol bikpela pilai na ol arapela samting bilong amamasim gavman na mekim ol i luk gutpela long ai bilong ol ovasis kantri.

Na ol dispela samting tru bilong helpim sindaun bilong pipel nau na long bihaintaim i no stap long baset. Bai yumi lukim wankain samting olsem i kamap long taim gavman i skelim mani bilong 2014 o nogat?

Yumi olgeta i save olsem Mosbi em i ples we ol bikpela bung bilong Pasifik Festival ov Ats, Pasifik Gems na miting bilong APEC bai kamap.

Na long Lae tu ol bikpela wok long bris i wok long kamap gut. Yumi amamas bikos PNG inap long go pas long kamapim ol dispela bikpela wok.

Tasol yumi mas askim tu sapos i gat baset bilong ol dispela samting. Nogut sampela imejensi wok i

kamap na ol i pulim mani bilong narapela wok i go long mekim ol wok redi we i no gat baset long en.

Long taim gavman i kisim wok bihain long 2012 nesnel ileksen olgeta memba i kalap i go na sindaun wantaim gavman. I gat 6-pela memba tasol i stap long Oposisen.

Maus bilong ol i no inap long winim gavman. Olsem na i isi tru long gavman i tok orait long wanem lo o senis em i laik kamapim. Vot bilong ol bai winim husat i laik egensim ol.

Dispela piksa yumi lukim tude em i mak bilong ol samting bai kamap long Palamen inap kantri i go bek long 2015 ileksen.

Olsem na yumi askim dispela liklik kwesten tasol. Wanem taim bai ol pipel i lukim ol memba i kamapim senis we bai helpim laip bilong ol pipel?

Inap ol i sotim pepa wok na kamapim lo bilong helpim wok bilong ol haus sik insait long kantri?

Ol rot na bris na haus i ken helpim wok bilong developim kantri. Tasol laip bilong pipel em i bikpela moa na i winim ol dispela samting.

Em i no hatwok long helpim pipel. Gavman i gat namba long sanap long Palamen na mekim dispela senis. Bai yumi wet na lukim.

Yumi tromoi tasol dispela toktok i go long wan wan memba i ken skelim. Ol i ken glasim na skelim tingting bilong ol sapos ol i kamapim gutpela senis long sevim laip bilong pipel o nogat.

NAQIA i yusim SMS long tok save hariap

NAQIA, (Nesanel Agrikalsa Kwarantin Investigesen Atoriti) nau i ken tok save hariap long ol abus i sik o idai, wantaim Sot Mesij Sistem o SMS.

Em i namba wan taim long kantri long yusim ol mobail fon long tok save long ol abus i sik o dai,.

Ol lain bilong yusim dispela sistem em ol opisa bilong NAQIA, provinsal DPI opis bilong lukautim ol abus long olgeta hap bilong kantri, wantaim tu ol NGO i stap nabaut long rurel ples.

Projek Kodineta na Ekting Progrem Menesa bilong ol Abus, Dokta Estelo Quimbo i tok ol ripot bilong wanpela wik em ol i save bungim na salim i go insait long internet databes olgeta Mande, bilong ol saientis bai mekim wok painimaut long ol dispela



Ol lain i kisim trening long Maun Hagen long rot bilong yusim ol SMS.

Poto: Aaron Uforty

sik na dai bilong ol abus.

"Mipela nau i ken painimaut hariap long wanem samting i wok long kamap long olgeta hap bilong PNG na mipela

bungim ol dispela toksave na putim long internet." Dokta Quimbo i tok.

NAQIA PNG wantaim Australia Dipatmen bilong

Egrikalsa Fiseris na Forestri (DAFF) na AusAID i kamapim dispela projek long mun Janueri long dispela yia.



Published Weekly, Thursday, for Word Publishing Company, Ltd.

P.O. Box 1982, Boroko, NCD Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Websait: www.wantokniuspepa.com

Pe bilong wanpela yia, 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager Elizabeth Konga
Acting Editor Veronica Hatutasi

Published at Able Building Complex, Sec 58 Lot 02, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest or its absolute discretion. The publisher's general terms acceptance are available at Word Publishing Company Ltd and are set out full on the display advertising form.

Nupela buk long helpim menesim sik long het...

... Moa long 450 milien long wol gat sik ya

Veronica Hatutasi i raitim

WANTAIM ol senis i wok long kamap hariap tude log PNG na wol, wangepa long ol eria we i lukim ol yangpela pipel na ol narapela tu i bungim hevi na bagarap long en em long mental helt. Mental helt em taim tingting bilong man

i stap gut na em i ken wok, skul na mekim ol narapela samting gut. Taim tingting bilong man i paul, bai em i krangi na stap, wokabout na wok i no go gut na em taim nau bai gat hevi long mental sait.

Insait long sosaiti, famili na komyuniti bilong yumi tude, yumi lukim planti pikinini na ol yangpela i gat sik long tingting o mental helt sait bikos long ol sosel, "peer presa" na famili hevi. Na ol yangpela i kisim mariwana, go insait long ol kalt na strongpela dring long rausim ol hevi i karamapim ol.

Long longpela taim insait long PNG, pipel i save lukluk nogut long ol lain i gat sik long tingting na Laloki Saikaitrik Haus sik em ol i save tok em haus sik bilong ol longlong lain.

Tasol wantaim awenes, isi isi ol pipel i wok long luk-save nau olsem sik long tingting em i olsem ol narapela sik na ol i isi long senisim lukluk bilong ol long Laloki na sik long tingting lain.

Long tude, Laloki Saikaitrik Haus sik i gat planti yangpela pipel i gat long em planti skul manki long hai na sekonderi na yunivesiti level, sampela yangpela meri na ol narapela woklain olsem loya na dokta i stap.

Ol gutpela woklain i lukautim ol i stap

Long Wol Helt ripot, mak long 450 milien pipel long wol tude i bungim hevi long sik bilong tingting, moa yet yusim krangi spakbrus na strongpela dring i kamapim.

Long luksave moa long sik bilong tingting na long helpim ol haus sik klinikel woklain i givim ol gutpela lukaut, tripela sik bilong tingting ol Saikaitrik dokta i bin raitim wangepa buk ol bin lonsim las wik.

Nem bilong buk em, "Management of Mental Disorders in Papua New Guinea", Treatment Manual for Clinical Health Workers em Dokta Umadevi Ambihapahar OBE, Dokta Monica Kakirau Hagali na Dokta Goiba Tienanag, i putim han wantaim na raitim.

Dokta i go pas long Mental Health Seksen wantaim Helt Dipatmen, Dokta Ambi i tok ol i raitim dispela buk long isi we pipel na moa yet, ol helt woklain long olgeta hap bilong PNG i ken klia na lukautim ol lain i gat sik long tingting.

"Tingting i no isi samting na sik long tingting em i hat, i no olsem ol narapela sik we yumi ken lukim na skelim marasin na givim. Mipela i raitim dispela buk bilong givim gaid o stia long ol helt woklain long ol ruel eria tu na ol i ken givim stretpela mak bilong ol marasin," Dokta Ambi i tok.

Gavana Jenerel Sir Michael Ogio husat i bin lonsim nupela buk i tok "major depression" (dipresen) o sik i kamap taim man i tingting planti i as bilong ol disebol sik na em i kamap olsem namba 4 bikpela sik long wol. Na long PNG, sik long tingting na ol hevi em i kamapim i wok long go bikpela long ol famili, skul ol komyuniti.

Sir Michael i tok long las 50 krismas, i gat moa save long kru bilong man na as bilong sik bilong tingting na olsem, i gat nupela luksave na hop long ol lain i gat dispela sik.

Em i tok pastaim, ol save lokim ol lain i gat sik long tingting long ol mental haus sik, tasol nau, i gat komyuniti kea na spes long ol haus sik bilong ol dispela kain siklain.

"Senis i kamap bikos i gat luksave long humen rait bilong ol wanwan na tu, ol nupela marasin na tritmen ol i gat long en," Sir Michael i tok.

Em i tok ol mental helt woklain i gat bikpela wok long daunim ol suasait ol lain i save kilim ol yet, wokim kalt long ol skul, ol hevi i kamap bihain long kisim krangi strongpela dring na spakbrus, reip, HIV na AIDS, domestik vailens, famili na marit bruk na ol arapela sosel hevi.

Taim em i amamas long ol dokta na mental helt woklain long putim kamap nupela buk, em i tok sik long tingting na pasin i save kamapim bikpela hevi na sori long ol wanwan i bungim sik na ol famili bilong ol. Na dispela buk bai helpim gut ol lain i save helpim long sevim ol lain i gat sik long tingting long kamap orait.



NUPELA BUK: Gavana Jenerel Sir Michael Ogio i lonsim nupela mental helt buk na Dokta Monica Hagali i lukluk long sait. *Poto: GG Midia*

Air Niugini i helpim yet Buk bilong Pikinini

AIR NIUGINI i soim gutpela pasin yet long helpim Buk Bilong Pikinini (BbP) wantaim tupela tiket i go long Singapo olsem prais long taim bilong fan resing bilong BbP tupela wik i go pinis. Resis bilong dispela tiket i kamapim K26,000.

Wantaim dispela kain helpim, BbP i go het yet wantaim wok bilong kirapim na strongim ol BbP buk laibreri

long olgeta hap bilong kantri long mekim ol pikinini bai laikim pasin bilong ritim buk.

Gabriel Pillay bilong Pot Mosbi i bin laki wina bilong dispela tupela tiket, taim ol i mekim dro long fan resing nait.

Komesel Jeneral Menesa bilong Air Niugini, Dominic Kaumu i tok, long yia i go pinis, Air Niugini i bin helpim ol wok lain bilong Buk bilong

Pikinini long go raun long kantri na lukluk raun long 14 laibreri. Ol i givim tiket tu long ol trena bilong Buk bilong Pikinini i kam insait long kantri long lainim ol woklain bilong PNG yet.

Sif Eksekutiv Opisa bilong Buk bilong Pikinini, Joanne Greneger i tok BbP i no save mekim mani, olsem na em i tenkim ol lain i sapatim dispela wok, olsem wan wan

manmeri na tu long ol kampani helpim olsem Air Niugini i mekim.

Em i tok, wok bilong Buk bilong Pikinini, em long bringim buk i go long ol pikinini wantaim ol laibreri long kantri. Ol 14 laibreri bilong BbP i stap long Pot Mosbi, Alotau, Lae na Goroka.

Helpim bilong Air Niugini i bin stat long yia 2007 na bai i go yet.



L-R Komesel Jeneral Menesa bilong Air Niugini, Dominic Kaumu i givim tiket igo long ol Buk bilong Pikinini. *Poto: BBP*

Australia na PNG Foren Minista bung long USA

MINISTA bilong Foren Afeas na IMIGRESEN, Rimbink Pato i bin bung wantaim Mis Julie Bishop, na i tok amamas long nupela Prais Minista i makim em olsem Foren Afeas Minista bilong Australia.

Mis Bishop em i wangepa meri tasol insait long kabinet bilong nupela gavman bilong Australia aninit long Prais Minista Tony Abbott.

Minista Pato i bin bungim Mis Bishop long taim ol i bin go long kibung biilong namba 68 Yunaitet Nesen Jeneral Asembli (UNGA) long de 23 i go 30 Septemba long bikpela sititi Niu Yok.

Mista Pato i tokaut olsem tupela minista na gavman bilong ol i ken wok bung yet na strongim wok poroman yet na wantaim nupela Abbott gavman, PNG bai lukluk long kamapim bikpela moa patansip long ikononimik.

Tupela Minista i toktok long Asailam Sika Rijnol Senta, na ol i lukim olsem dispela wok i kamap gut namel long tupela kantri. Mista Pato i toktok moa long Asalam Sika program wantaim imigresen Minista bilong Australia, Scot Morrison. Mista Morrison na Minista Pato bai i toktok moa taim Morrison bai i kam long PNG.

Tupela Minista i wanbel olsem enuel PNG-Australia Ministeral Forum bilong dispela yia bai kamap long Kanbera. Foren Afeas Minista i tok gen long ol toktok i bin kamap pastaim taim Foren Afeas Minista bilong Australia i stap yet long oposisen bai i mas kamap hariap. Dispela ol toktok em long;

- (a) Bringim 200 polis manmeri pastaim long dispela yia i pinis,
- (b) Stretim Angau Referel Haus Sik long Lae
- (c) Stretim plen na disain bilong Lae-Madang Rot

(d) Stretim plen na disain bilong opis bilong Lowa Kots long Waigani

(e) Putim mani na helpim long Ross Garnaut na Sir Rabbie Namaliu Ripot bilong ol Yunivesiti.

I gat planti moa bikpela toktok long mekim tasol tupela minista i tok bihain ol i ken tok tok moa long Mosbi taim Foren Afeas Minista bilong Australia i kam o long taim ol i go miting long APEC long Bali o long Enuel Forum bilong ol Gavman Minista bilong PNG na Australia.

Paul i mekim wok dokta long kirapim kantri

Mathew Yakai i raitim
MY Media & News Agency

STORI bilong Paul Konare olsem wanpela Nening Opisa long 80's em i wankain olsem planti ol pablik sevan husat i mekim bikpela wok long kamapim PNG.

Paul i save kalapim bikpela maunten, brukim ol bikpela wara na wokabaut long bus long mekim wok dokta boi na helpim ol mama na pikinini long ol asples bilong Madang we gavman sevis i no go yet.

Dispela em i stori bilong kain ol pablik sevan husat i no wari long pe na alauwens, tasol ol i gat bel long mekim wok stret, na kisim sevis i go long ol pipel.

PNG i kisim independens long 38 krismas, tasol planti gavman sevis olsem helt na skul i go long planti hap bilong kantri.

Maski kantri i gat planti risos olsem gol, kopa, timba, pis, kokonas, kakao na ol narapela moa, ol manmeri long planti hap bilong kantri i wet yet long lukim tru kala bilong ol sevis.

Tude, gavman i toktok tumas olsem ikonomi bilong kantri i gro na planti sevis i go long ol pipel, tasol dispela em ol kusai toktok tasol bilong wanem, sevis long planti hap i no kam gut.

Nau, gavman i putim was long LNG bai bringim planti winmani i kam long 2015 taim ol i salim ges bilong LNG projek, tasol dispela bai kamap tru o nogat. Em yumi no save yet.

Tasol Paul em i yangpela man na krismas bilong em i mak olsem 40 yia na em i gat bel stret long helpim ol pipel.

Em bilong asples Guyebi long Bundi distrik bilong Madang provins we em i wanpela bilong ol laki man long go long skul.

Tude em i wok olsem wanpela nening opisa wantaim Ramu NiCo.

Em pinisim skul bilong em long Madang Skul ov Nening, na kisim setifiket long jeneral nening bihain long em i pinisim hai skul long Malala namel long 1974 na 1975.

Bihain long dispela, Paul i painim wok long Bundi Helt Senta long 1980 i go 1981, tasol em lusim na go long Aiyom Helt Senta long Middle Ramu Distrik.

Paul i bin go wok long ol asples na distrik long ol bus ples bilong Madang we planti pablik sevan tude i save les long go bilong wanem, i nogat rot bilong kar na nogat ol gutpela sevis i stap.

Long Aiyom, ol i makim em olsem OIC na em i lukautim nutrisin na imunaisesen o banis sut wok long ol mama na ol pikinini.

Em i save wokabaut long bus wantaim 6 o 8-pela man i helpim em long karim patrol bokis

marasin na kaikai.

"Mi save wokabaut long bus rot wantaim 8-pela man i karim kako bilong mi bilong wan o tupela wik long karim aut ol helt progrem," Paul i toktok.

Bihain long Aiyom, Paul i bin transe i go long Hatzfeldheaven Helt Senta long Daigul, Bogia Distrik long Madang we em i bin wokim ol wankain wok long helpim ol mama long nutrisen progrem na tu, givim banis sut i go long ol pikinini.

"Mi go long ol ples we i bus tru olsem Yakiba, Mugumand, Yavera, dispela em ol bus ples insait long Almami Sensus Divisen long Bogia," Paul i tok.

Wok bilong Paul i kisim em i go long ol ples olsem Bogia, Aiyom, Illeg long Rai Kos na tu igo long Malala Hai Skul helt senta.

"Long 1986 mi stap long Bogia na go long ol ples olsem; Serekem, Andarum, Sokum, Lrenk na skulim ol mama na givim banis sut long ol pikinini."

"Mi mekim ol dispela wok wantaim bel sori na mi no wari long alauwens o poket mani. Sapos mi no mekim bai husat i wokim?" Paul i askim.

Paul i no wet long alauwens na poket mani olsem ol pablik sevan bilong tude i save mekim.

Maski nogat mani, Paul i go yet bilong wanem, toksave i go pinis na ol mama na pikinini i wet i stap.

"Sampela taim mi save kisim mani long ol kansel long mekim wok taim gavman i no save go hariap" Paul i tok.

I no olsem tude we ol pablik sevan i save kisim bikpela travel alauwens, slip long gutpela hotel, gat haia kar, mobil pon na ol samting long mekim ol wok isi.

Paul i save kisim K7.30 long wanwan de alauwens long 80s na K13 long 90s.

"Mi save peim ol kago boi K0.50 long wanpela de long wanwan boi long 80s na K2 long wanpela long 90s" Paul i tok.

Paul i tok olsem bihain long independens bilong PNG long 1975, i no gat wanpela gavman sevis i go long ol dispela ples i kam inap long 80s na ol papa, lapun, mama na pikinini i kisim taim long liklik sik we marasin inap helpim sevim ol.

"Pastaim long independens na bihain tasol long 1975, i bin gat gavman sevis we ol kiap i kisim i go, tasol bihain em nogat stret," Paul i tok.

Paul i tok tu olsem planti pablik sevan i les long go long ol bus ples bilong wanem, nogat gutpela luksave bilong gavman na laip i hat stret.

Em i tok tu olsem ol pablik sevan husat i stap long taun tu i no save mekim wok gut na kisim pe long gavman nating i stap.

Stori bilong Paul em i wanpela bilong ol luksave we gavman bi-

long PNG pastaim na tude tu i no wok hat stret long kisim ol gutpela sevis i go long ol pipel insait long ol bus ples na nam-bis.

Tude Paul i wok olsem wanpela Nening Opisa yet tasol wantaim Ramu NiCo long Basamuk Rifaineri long Rai Kos bihain long em i wok wantaim Highlands Pacific Ltd. Ol hatwok bilong em wantaim gavman i givim bikpela luksave na ekspirians long wok tude wantaim Ramu NiCo.

Wantaim Ramu NiCo, Paul i save helpim planti sik man na meri bilong kampani na tu ol asples lain long Basamuk we i no gat gutpela helt senta i stap inap tude.

Em i helpim planti mama tu long karim pikinini, na planti ol pikinini man em ol givim nem bilong Paul i go long ol.

Taim dispela nius man i askim Paul hamas sik man na meri em i helpim, em i bekim na tok, "hey planti na namba bai sot ya."

"Tasol wanpela mi tingtim yet em long asples Tugyag long Basamuk we wanpela mama i gat bel long 9-pela mun na pikinini i dai. Sting i stap insait long bel. Mi putim han i go insait, na rausim ol liklik hap bodi pat bilong bebi inap las stret, mi rausim het bilong em na bilum bilong bebi ya," Paul i stori.

Dispela em wanpela bilong ol bikpela helpim Paul i save mekim inap tude long Basamuk. Neks wik, bai mi stori long ol dispela wok bilong em.

Paul i wok long opis bilong em long Basamuk Helt Senta.

Paul i kalap long helikopta long wanpela ron we em i helivim sik man.



Paul i reri long helivim wanpela mama long karim pikinini long Rai Kos.



Paul i wok long opis bilong em long Basamuk Helt Senta.

Paul i kalap long helikopta long wanpela ron we em i helivim sik man.





Program bilong Wanwan De

De - Mande - Fraide

6am - 10am - Sankamap show - Host: Kas.T
6:00am - Major Nius Bulletin
6:15am - Komuniti Notis Bod
6:25am - Taim Bifo - wanpela singsing b'long bifo.

Tasol
9:30am - Final aua cruz
10am - 3pm - Morin Trek na Belo Pack
10:00am - Major Nius Bulletin - YUMIFM Nius Senta

2:00pm - Major Nius Bulletin - YUMIFM Nius
2:05pm - YU TOK - komiuniti awenes program
2:45pm - YUMI PANIM WOK Segment
3pm - 7pm - Avinun Draiv Taim - Host: Vaviessie

6:10pm - 7:00pm Mon kamap sho
6:45pm - Komuniti Notis Bod
7:00pm - 9:00pm - COCA COLA GARAMUT
7:00pm - Nius - YUMIFM Nius Senta

Sarere belo cruz - Host: Tuluvan Vitz
1pm - 2pm - Sarere Belo Taim Dedikesen
2:00pm - Nius - YUMIFM Nius Senta

RADIO AUSTRALIA TOK PISIN PROGRAM HARIM LONG: 101.9 FM

6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

TUNDE - Moring - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

TRINDE - Moring - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

FONDE - Moring - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

FRAIDE - Moring - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

SARERE - Nait
7PM Stesen op - Ol Nius Hetlain/Program Priviu
7.05PM Musik na Chit Chat

SANDE - Nait
7PM Stesen op - Ol Nius Hetlain/Program Priviu
7.05PM Musik na Chit Chat



Raun wantaim Wantok kru ...

Pasin tumbuna i strong yet long Is Nu Briten

Nicky Bernard i raitim

PASIN bilong tumbuna i no lus yet long sampela ol provins bilong yumi insait long Papua Niugini, sampela provins i wok long lus isi isi nau.

pasin bilong baim kaikai long sel mani na pasin bilong danis tumbuna i stap yet. Wan wan liklik ples long hap i gat stail bilong tumbuna danis bilong ol, danis bilong baim meri o danis bilong welkam long ol bik manmeri, dispela ol danis i gat we bilong paitim kundu na we bilong tromoi han na lek.

bikpela na sapos yu stap klostu bai lek bilong yu tu i laik bihainim pairap bilong kundu bilong ol. Welkam danis long Is Nu Briten i save stail stret, taim yu kam daun long balus na ol redi long welkamim wanpela bik manmeri ai bilong bai no inap lus long ol dispela danis grup. Bai yu laikim we bilong danis bilong ol.

Tru tru Is Nu Briten em ples bilong ol turis. Sapos TPA i strongim turis long dispela provin, i no tumbuna pasin tasol ol turis bai lukim, i gat gutpela nambis bilong ol na ol ples bilong woa bipo i stap yet na planti moa samting we bai pulim ai bilong ol turis. Pasin bilong lukautim ol manmeri tu stap long dispela RADAZS provins.

EMTV Television Guide

Table with columns for time and program name under 'FONDE OKTOBA 3, 2013'.

Table with columns for time and program name under 'FRAIDE OKTOBA 4, 2013'.

Table with columns for time and program name under 'SARARE OKTOBA 5, 2013'.

Table with columns for time and program name under 'SANDE OKTOBA 6, 2013'.

TORO



BIABIA



KANAGE



TOKWIN

Paitim kontrakta nating long Lae...

Mi lukim long Tunde EmTV nius we sampela man i paitim nogut tru wanpela kontrakta man we i tokim wanpela man long noken tromoi pipia i no gutpela pasin tru..Polis mas lukluk gut long dispela hevi na sasim ol dispela kanaka we ol i paitim turangu wokman. Gutpela tru na EmTV i putim long nius na mipela i luksave husat em ol dispela lain..Tokwin i salim toksore long yu na stap strong long gutpela wok bilong yu..

Liklik ren blesim gut Mosbi...

Tenkyu tru long Bikman antap i salim liklik ren i kamdaun long Mosbi long Tunde we i klinim Mosbi long das na rausim sampela pipia. Dispela liklik ren i pulumapim Sirinumu dem bilong mipela we yumi gat inap wara long Mosbi na pairapim belo long ol NCDC long stretim ol pothol long hariap bipo bikpela ren i kapsait.

Surukim buai ban, surukim moa pipia...

NCDC Gavana tok, em no stretim ol maket we ol manmeri

ken go salim buai long hap, tasol sasim ol manmeri bai go het yet taim yu kaikai buai na spet long pablik ples..Rainbow na Gerehu em pulap long buai yet na ol manmeri i mekimsave long spet i go kam na surukim moa pipia long hap..Maski spot fain, tokim ol lain husat i salim buai long klinim ples ol i salim buai long en na putim ol bikpela prabis bin..Ol i no peim takis long salim buai. Givim wok long ol long klinim maket o sasim ol K1000, bikos ol save mekim moa long K1000 long wanwan de long salim buai tasol!

Tokwin Tasol...

Long yupela ol gutpela Wantok rida i save wokim ol Sudoku kroswod pasel, dispela em nupela SUDOKU.

Long solvim Sudoku pasel, putim wanpela namba long wan wan bokis na olgeta ro sudem akros, daun, na olgeta liklik 9-pela bokis skwea long bikpela daigrem o bokis (i gat 9-pela olgeta) bai gat ol namba long 1 inap long 9. Wanpela namba i mas kamap wanpela taim tasol long wanpela ro. Wok wantaim ol namba olsem gaid o stia na wok long pinisim wan wan daigrem wantaim ol missing namba we bai mekim yu painim solusen. Tenkyu na gutpela pilai

STATIM PILAI

Lukluk long namba 9 kolom, bilong pasel piksa i stap long han kais. i gat ol sain insait long pasel bai i ken toksave long wanem hap insait long dispela kolom bai namba 3 i go.

Nambawan sain i stap long namba 8 kolom insait long piksa. I gat wanpela namba 3 insait long namba 5 bokis. Bai yumi i no i nap long putim wankain namba tupela taim insait long wanpela 3 x 3 bokis eria, olsem na yumi bai i no i nap putim namba 3 insait long bokis namba foa, faiv o siks insait long namba 9 kolom.

Yumi ken rausim tu tripela bokis daunbilo tru long namba 9 kolom bikos i gat wanpela namba 3 insait long dispela 3 x 3 bokis eria tu. Olsem na dispela namba 3 i mas go long namba 2 o 3 bokis bilong namba 9 kolom.

Laspela sain nau i stap insait long namba 2 lain bilong piksa na em i gat wanpela namba 3 pinis long en. Loa bilong pilai i tambu long wanpela namba i kamap tupela taim insait long wanpela lain, olsem na i gat wanpela bokis tasol nau i stap long dispela namba 3 i go insait — em namba 3 bokis bilong namba 9 kolom.

Bihainim dispela stail na wankain tingting na rausim i nap ol pasel bokis i pulap olgeta. Sapos yu laik save moa long insait bilong dispela pilai, yu ken go long webait long penny-dellpuzzles.com.

EXAMPLE

	7	9				1
2	3	8			6	7
	6		2	7		
7	8	5				
5	2	6		3		
			1		9	5
		6	3		8	
8	4			9	2	1
2				1	3	

EXAMPLE SOLUTION

8	4	7	9	6	3	5	2	1
1	2	3	8	4	5	6	7	9
5	9	6	1	2	7	4	8	3
9	7	8	3	5	4	1	6	2
4	5	1	2	9	6	7	3	8
6	3	2	7	1	8	9	5	4
7	1	9	6	3	2	8	4	5
3	8	4	5	7	9	2	1	6
2	6	5	4	8	1	3	9	7

Ansa bilong las wik SUDOKU 13

5	3	4	1	6	8	2	9	7
2	8	6	7	9	3	1	5	4
9	7	1	5	2	4	3	8	6
4	9	3	2	8	6	5	7	1
1	6	2	9	7	5	4	3	8
8	5	7	3	4	1	9	6	2
3	4	9	8	1	7	6	2	5
6	2	8	4	5	9	7	1	3
7	1	5	6	3	2	8	4	9

		5	9	6				1	
4					8			9	2
	1				5	3			
6		5			3			8	
1	7		9			2	5		
2		7		1				6	
	2	8				6			
6	9		3						1
3				1	6	9			

Ansa bilong SUDOKU 14 long neks isu.

EMTV Television Guide


11:00 AM G CHEF & HIS BETTER HALF	Classroom Broadcastfollowed by the Australia Network	5:00 PM G KITCHEN WHIZ4 Ep#30	11:20am Grade 8 Science
11:30 AM G AROUND THE WORLD IN 85	9:00am Grade 7 Mathematics		5:30 PM G DANI'S HOUSE YR2. EP#9/13	1:00pm Grade 6 Mathematics
12:00 PM G NRL GRAND FINAL DAY	9:50am Grade 7 Science	TUNDE OKTOBA 1, 2013	6:00 PM G EMTV NATIONAL NEWS	1:50pm Grade 6 Science
12:30 PM G NEW SOUTH WALES CUP	10:40am Grade 8 Mathematics		7:00 PM G HAUS& HOME Ep#34	2:30PM DEPI Program
2:45 PM G HOLDEN CUP	11:20am Grade 8 Science	4:57 AM G AUSTRALIA NETWORK	8:00 PM G BUSINESS PNG - Ep#37	3:30 PM G KIDS KONA
5:00 PM G EMTV NATIONAL NEWS	1:00pm Grade 6 Mathematics	5:00 AM G JOYCE MEYER - 1045-2	8:30 PM PGR OFF THE MAP - PREMIERES -	3:30 PM HI 5 - S7 Ep#10/47
5:30 PM G NRL GRAND FINAL	1:50pm Grade 6 Science	5:30 AM G EMTV NEWS REPLAY	9:30 PM G EMTV NEWS REPLAY	4:00PM BACKYARDIGANS EP#13/29
9:30 PM G TOKPIKSA EP#36	2:30pm DEPI Program	6:30 AM G TODAYfollowed by the Australia Network	4:30PM DOGSTAR EP#19/26
10:00 PM MAO MOVIE - Good Fences	3:30 PM G KIDS KONA	6:30 AM G GENERAL VIEWING	TRINDE OKTOBA 2, 2013	5:00 PM G KITCHEN WHIZ4 Ep#31
11:30 PM G HILLSONG Rpt...	3:30 PM HI 5 - S7 EP#8/47	9:00am Grade 7 Mathematics		5:30 PM G TRICKY TV S3 - Premieres..
12:00 AM G EMTV NEWS - Replay	4:00PM BACKYARDIGANS EP#10/29	9:50am Grade 7 Science	AUSTRALIA NETWORK	5:57 PM G CRIME STOPPERS
.....followed by the Australia Network	4:30PM DOGSTAR S1 EP#17/26	10:40am Grade 8 Mathematics	JOYCE MEYER - 1043-3	6:00 PM G EMTV NATIONAL NEWS
MANDE SEPTEMBER 30, 2013	5:00 PM G KITCHEN WHIZ S4 Ep#29	11:20am Grade 8 Science	5:30 AM G EMTV NEWS REPLAY	7:00 PM PGR FACT FILES - The Joy of Stats
4:57 AM G AUSTRALIA NETWORK	5:30 PM G TOTALLY SPIES EP#22	1:00pm Grade 6 Mathematics	TODAY	8:00 PM G TOK PIKSA Ep#36 - Repeat....
5:00 AM G JOYCE MEYER - 1045-1	5:57 PM G CRIME STOPPERS	1:50pm Grade 6 Science	GENERAL VIEWING	8:30 PM MA ARROW
5:30 AM G EMTV NEWS REPLAY	6:00 PM G EMTV NATIONAL NEWS	2:30pm DEPI Program	Grade 7 Mathematics	9:30 PM G NEWS REPLAY
6:00 AM G TODAY	7:00 PM PGR GLEE YR.3 - EP#4/22	3:30 PM G KIDS KONA	Grade 7 Sciencefollowed by the Australia Network
09:00 AM GENERAL VIEWING	8:00 PM PGR HOMELAND S2 - Ep4/12	4:00PM BACKYARDIGANS EP#11/29	Grade 8 Mathematics	
	9:00 PM G COCA-COLA SPORTS SCENE EP	4:30PM DOGSTAR EP#18/26		
	9:30 PM G EMTV NEWS REPLAY			

Ol Progam na Kilok i ken tenis oltaim...

Wiken poto



KOMYUNITI PILAI: Ol komyuniti klostu long Laloki Saikaitrik haus sik i save gat kmyuniti pilai long ol wiken. I bin gat wanpela soka tim bilong ol yangpela manki long haus sik we wanpela dokta i bin go pas long en, tasol nau dokta i lusim kantri, nogat soka tim nau. Tasol em i gutpela sans long ol haus sik lain na komyuniti i save sindaun rileks na lukim ol pilai olsem long dispela poto. **Poto Terence Akuman**



LAKE MURRAY: Sampela sumatin bilong Lake Murray Praimeri skul long Westen Provins i amamas long Wantok i kisim poto bilong ol. **Poto: Nicky Bernard**



OL 2015 GEM AWENES: Ol lain bilong ples Manugoro Wod 1 long Hiri Wes, Rigo Distrik i amamas long harim ol awenes we 2015 Pasifik Gems ogenaising komiti i bin mekim taim ol i raun i go long dispela ples long las wiken. **Poto: Frieda Kana**

Raun wantaim Kanage olgeta wik

Dei bilong tingim ol soldia long wo

I no tulait gut yet na Kanage i stat long kraik. Em i tingim ol tum-buna bilong em ol Siapan (Japan) i kilim em. Taim meri bilong em i harim Kanage i kraik meri i askim Kanage lewa long wanem samting stret na em i wok long kraik. Em askim em olsem, "Yu hanger o yu tingim ol yangpela taim bilong yumi bung long as bilong mango na pasim tok long marit. Dispela i mekim Kanage i mekim Kanage i singaut nogut tru na kraik, "O papa bilong mi, husat i kilim yu ol Siapan o yumi Niugini Papua yet. Netpi kaikai Netpi na kanaka kaikai kanaka." Taim meri i harim olsem em i lap i dai nogut tru na apsait ai bilong em i kam aut.

Jamex Angoram, Is Sipik.



Maunten paia

Maunten paia long Manam na wesani pundaun long olgeta hap. Planti tru i pundaun long gras kantri long Angoram distrik. Olgeta sak sak kanu i pulap long wesani. Monin tru ol meri long ples ol i bung na stori long wanem samting i kamap. Taim Kanage i harim olsem em i tokim meri bilong em. Em nau ples nogut bilong ol sin man i paia pinis long hel. Nau yumi lukim das bilong ol bun bilong ol i kam long yumi. Dai man i pundaun kam daun na wasim yumi. Bai yumi i no inap dai moa na

tu bai nogat las de moa. Bai yumi stap long ples long de taim tasol na wetim ol man i dai tasol na wetim ol man i dai bipo bai tromoi tin pis na rais kamdaun long yumi olsem dispela wesani pundaun nau ya. Taim ol meri harim ol kon stori bilong em, ol i kalap kalap na paitim han na ol i singaut, "Hepi gut de Kanage. Wis yu ol the bes. Lip fo eva mo. Hel i pinis na heven i kamap."

Carl Lenua Samban base.

Ol skwat!
Salim ol gutpela Kanage tok pilai i kam long:
Kanage Tok Pilai
P.O. Box 1982,
Boroko, NCD
Port Moresby.
Email: jwilson@wantok.com.pg

Mi ting mi save long patna bilong mi

Dia Laipain,

Mi wok long stap wantaim poroman bilong mi wanpela yia na nau mi kirap nogut long painimaut olsem sampela ol pasin bilong em i narakain. I no olsem long bipo taim mi save long em taim mi tupela i pren tupela yia olgeta.

Em i save tingting nogut sapos mi toktok wantaim brata trutru bilong mi o kasen bilong mi, na save askim mi long wanem hap mi go o long wanem hap mi stap long en.

Em no save laikim long go soping mi wanpela, na i save laikim bai mi mas stap klostu wantaim olgeta taim. Taim mi go long pablik wokbung, ai bilong em i save pas long mi tasol.

Mi askim mi yet olsem, mi bin mekim rong long stap wantaim dispela man nau em i patna bilong mi? Mi tupela i gat wanpela naispela wan yia pikinini man, na mi wok long tingting sapos em i orait long em bai lusim em o nogat?

MADE A MISTAKE!

Dia Pren,

Tenkyu long tokaut long tingting bilong long mipela. Pren, i no yu tasol i stap long dispela kain hevi, mipela i save kisim planti wankain olsem dispela leta bilong yu i kam long ol yangpela man-meri insait long kantri.

Yu i askim yu yet, sapos yu i mekim rait tingting long stap wantaim patna o poroman bilong yu. Pastaim tru, yu kolim em olsem patna o poroman bilong yu na i no man bilong yu. Mipela i bilip yu mas save olsem prensip bilong yu tupela long marit i no ligel o i nogat tok orait long en aninit long loa. Dispela em i olsem, yu no wokim wanpela we bilong marit i stap aninit long loa bilong yumi we bai makim olsem yu tupela i marit. Ol we bilong marit aninit long lo em;

1. Sivil Marit (Civil Marriage) we yu tupela ken marit na rejistaim nem bilong yu tupela aninit long Sivil Rejistri opis wantaim Dipatmen bilong Komyuniti Dvelopmen,

2. Marit long Sios (Church Marriage) we yu tupela i ken mekim wedding bilong yu tupela na pater o pastor i blesim marit bilong yu tupela.

3. Marit long Kastom (Customary Marriage) we yu ken eksens long ol kaikai samting bilong kastom wantaim mani olsem mak bilong baim brait prais.

Olsem tasol marit bilong yu tupela i stap olsem defacto prensip o i no marit tru aninit long lo.

Dispela i minim olsem, yu tupela i no marit long trupela we, tasol yu tupela i stap wantaim nau long wanem yu tupela i gat bebi pinis o yu tupela i laikim



long stap wantaim bikos yu tupela i lukim olsem em i orait.

Yumi traim long adresim ol askim na wari bilong yu. Yu bin mekim rong taim yu stap wantaim man bilong yu? Ansa bilong dispela em YES na NO. Yu bin mekim tingting bilong yu bihainim save na laik bilong yu lons i gat patna long dispela taim i go pinis. Yu bin askim sampela skul tok tok long ol papamama bilong yu o ol bikpela lain bipo yu mekim tingting bilong yu tu o nogat? Yu save tu o ol tokim yu long pasin bilong man bilong yu taim yu tupela i stap wantaim o taim yu tupela i bin pren bipo yu tupela i stat long stap wantaim?

Taim yumi askim ol askim long antap, yumi lukluk long isu i givim gutpela na trupela laikim na gutpela marit. Long mekim gutpela tingting long painim gutpela patna i no wanpela isi samting long mekim.

Dispela kain samting i save kisim taim, bel isi, painim na toktok wantaim ol bikpela man-meri, o sapos olsem wanem, yu ritim buk na lukim ol program long TV we i save givim skul long painim rait patna. Wankain long dispela ol samting, i nogat wanpela bai i nap long eksem dispela ol samting.

Tasol wanpela i ken painim wanem samting em i laikim long em taim em i putim olgeta tingting bilong em long wanem samting em i laikim tumas taim yu gat strongpela tingting na pasin.

Papa mama wantaim ol bikpela lain na pren bilong yu tu i ken helpim long givim skul toktok long painim gutpela patna.

Nau yu bai lukim olsem, sampela pasin bilong man bilong yu i kam klia we yu bin lukim taim yu tupela i no bin stap wantaim o taim yu tupela i bin pren tasol. Planti yangpela pipel i save kisim kankain hevi long marit laip bilong ol tu. Dispela i wanpela proses o rot bilong yu gro wantaim insait long prensip bilong marit. Sampela as bilong dispela em ol:

- Bikpela tingting olsem patna i ken mekim kamap samting;
- I no lainim ol gutpela samting long taim em i groa ap;
- No save long wok na ol samting bai yu mekim olsem marit man;
- No save gut long patna bikos yupela i no poroman longpela taim;
- No harim stia bilong papamama o was papamama;
- Laikim ol nogut samting long ol poroman;
- Lukim ol infomesen i no helti

long TV, mobail, intanet na megesin; na
• Long ol samting bilong bipo ol i no stretim.

Antap em ol sampela samting i kontribut long ol hervi we yu na patna bilong yu i bungim long en stat long nupela marit laip bilong yutupela.

Bai yu wanbel olsem yu bin laikim patna bilong yu na yutupela i go stap wantaim inap nau yu wok long askim yu yet sapos yu bin mekim raitpela disisen.

Wanem samting em lav? Lukluk long dispela tripela wod na luksave long ol sapos yu laikim stret man bilong yu o em i narapela samting.

INFATUATION, LUST NA LOVE.

Infatuation em samting bai man na meri i pilim taim ol i luim wanpela narapela long namba wan taim na em i ken kamap lav o Lust. Lav em putim patna pastaim long yu yet, na Lust em long slip wantaim narapela long kisim amamas tasol.

I gat ol as watpo patna bilong yu i mekim olsem na sampela em mipela i autim long antap.

Mipela i strongim yu long painim ol rot long helpim yu yet pastaim.

Yu ken painim helpim na stia long wanpela lain marit yu gat luksave long ol, ol pren o sios pasto bilong yu na meri bilong em.

Long wankain taim, olsem wanem long sait bilong yu? Taim hevi i kamap long tupela pipel, tupela wantaim i stap insait long en.

Noken sutim tok long wanpela, tasol i moabeta yu glasim sait bilong yu long dispela marit, tasol traim n a painim wanem samting yu no wokim stret long prenpasin na marit laip wantaim patna bilong yu.

Bikos marit bilong yupela i wok long stat tasol, i moabeta long tingting gut long ol toktok mipela i givim yu long en na painim helpim long yu na man bilong yu, na naispela liklik bebi bilong yutupela.

Mipela i strongim yu long gat hop o strongpela tingting long gutpela bihainim taim. i moabeta long larim God long bidim marit bilong yutupela bikos em tasol i wokim yumi, na em i save gut long yumi. Lukim long Provebs 3: 5,6.

Bikman i ken givim yu gutpela tingting.

Pren bilong yu, Laipain.

Sapos yu gat wari, rait i kam long Lifeline, P O Box 6047, Boroko, NCD. Telipon:3260011. Raitim trupela nem na etres bilong yu na bai mipela i ken salim bekim long pas bilong yu. Bai mipela i no inap putim trupela nem bilong yu long stori.

Laipain

Polye laik helpim ol liklik kantri

Westpac redi long givim 2013 awot bilong ol meri

Stanley Nondol i raitim

NUPELA siaman bilong World Bank na Intanesenel Moniteri Fan (IMF) Don Polye i tokaut olsem em i gat tripela bikpela komitmen long wok wantaim ol 188 memba kantri long taim bilong em olsem siaman stat long neks yia.

Mista Polye husat i minista bilong Tresari, i tok em i laik helpim long groim ikonomi na helpim long daunim prais bilong ol kaikai na arapela samting na mekim wok i isi long ol liklik kantri i kisim dinau mani long World Bank na IMF.

Mista Polye i tok PNG i wanpela bilong ol liklik kantri we ikonomi i gro long taim bilong bikpela salens long samting olsem 10 yia i go pinis long taim prais bilong ol

komoditi i pundaun na i bin gat wol ikonomik kraisis.

Mista Polye i tok em laikm ol mani bilong ol bikpela kantri long wol i mas go long helpim ol liklik kantri na ol kantri we ikonomi bilong ol i no strong long kirapim wok developmen.

Mista Polye i laikim mani bilong Wol Bank na MF i mas wok gut na ol memba kantri na ol liklik kantri i kisim gutpela helpim long gro.

Mista Polye i tok PNG i mas daunim ol hevi bilong lo na oda, politikel stabiliti na slek pablik sevan na i no gat gutpela rot, bris na ol arapela infrastraksa na i mas kisim bikpela sevis long Wol Bank na IMF.

Mista Polye i tok 2014 baset bai i no inap go antap tumas. Em i tok kantri bai mekim baset long dinau long

2014 na 2015 na bai daunim gen long sampela yia bihain.

Mista Polye i tok gavman bai lukluk long fandim egrikaksa long baset tasol em i tok gavman bai fandim tasol ol bikpel projek we bai gat helpim i kam bek long kantri.

Mista Polye i tok ol projek olsem NCD rot na ol infrastraksa bilong 2015 games na 2018 APEC miting i no bin stap inbsait long 2013 baset tasol gavman yusim na bai go insait long baset bilong 4-pela yia. Em i tok baset defisit o ol eria we O'Neil gavman yusim mani we no gat long baset, em long ol lain stap nating long pe rol long provinsal gavman long K150 milien.

Mista Polye i tok ikonomi bilong kantri i grow na winmani bin kam gut long las 6-pela mun.

Westpac i tokaut long 14 meri husat i resis long winim 2013 Westpac Wimens Awot. Dispela awot i luksave long wok ol meri mekim long developmen bilong kantri.

Westpac ekting menesing dairekta, Donald lallam i tok em i gat bikpela amamas tru long lukim bikpela wok ol meri i mekim long developim kantri. Em i tok Westpac i soim bikpela luksave long wok bilong ol meri na inap long 7-pela yia nau ol i wok long makim wanpela wina.

Ol 14 meri long faivpela grup aninit long Westpac Awot i redi long go insait long bikpela resis long Oktoba 16 long Gateway Hotel long Mosbi.

Ol jas bilong wina bilong 2013 Westpac Wimen Award bai kamap long klostu taim long makim wanpela wina bilong 2013.

Wan wan grup wina bai stap insait long resis bilong winim 2013 Wimens Awot. Wina bilong wan wan grup bai kisim K5,000 edukesen

gren long sapatim edukesen bilong ol. Antap long en Westpac bai givim narapela K1000 olsem edukesen gren long wan wan grup wina.

Wina bilong 2013 Outstanding Wimens Awot bai kisim tropi na bai go long Australia long stap insait long Australia Eksekutiv Wimens Lidasip Miting long neks yia.

Jenerel Menesa bilong Westpac Pasifik i tok em i amamas long tokaut long wina bilong 2013 Westpac Awot na tok bikpela tenkyu i go long ol sponsa bilong wan wan grup long luksave long wok bilong ol meri long komyuniti na kantri.

Ol faivpela grup we ol meri long resis long painim fainol wina em:

Pricewaterhouse Coopers Praivet Sekta Awot (Anthonia Apurel, Patronilla Paisi na Angelyn Baker, SP Brewery Entrepreneur Awot (Sarah Shelley, Ruth Wollie na Michaeline Sovek), Steamship Public Sector Awot (Dokta Dinah Dovana-

Ope, Rose Singadan na Dokta Mobuma Kiromat), Trukai Komyuniti Awot (Maria Linibi, Cecilia Kuman, Penny Sagembo) na IBBM Yang Achiva Awot (Win-some Nenewa na Doris Cheryl Mondo Mulas.

Mista lallam i tok dispela awot em mak bilong soim Westpac komitmen long kamapim jenda balens long PNG.

Mista lallam i tok ol meri save mekim bikpela wok long developmen bilong kantri na wan wan de ol mekim bikpela wok na dispela kain program na awot i soim i gat bikpela luksave na amamasim wok bilong ol meri.

Mista lallami tok, Westpac i kamapim nupela program long givim skul tok na advais long ol meri na wina bilong wan wan grup bai kisim bikpela skul tok na advais long long 12-pela mun long strongim skills na save bilong ol long wanem wok ol i mekim stap.

Taiwan tred delegesesen bai kam long PNG

Stanley Nondol i raitim

WANPELA tred delegesesen bilong kantri Taiwan bai kam long PNG long dispela mun long soim ol kain kain samting ol i save wokim na tu, painim sans long poroman wantaim fe i bisnis long PNG long groim SME na ol arapela bisnis.

Taiwan Ekstenel Tred Developmen bai kisim 20 bikpela bisnis long Taiwan i kam long PNG. Long 2012 wankain tred fe i kamap na 5-pela bisnis long Taiwan i bin kam.

Dispela tred fe bai kamap long Oktoba 7 na 8 long Crown Plaza Hotel long Pot Mosbi.

Taiwan bai soim kain kain bisnis na ol samting ol save wokim na salim long ol arapela kantri, na bai ol i soim sampela gutpela rot bilong kamapim ol liklik na bikpela bisnis.

Man i makim maus bilong Taiwan long PNG, Daneil Hu i tok Taiwan i gat moa long 500,000 SME bisnis na em i sans bilong ol PNG bisnis i ken toktok wantaim ol Taiwan long save moa long kamapim ol SME.

PNG gavman i tok bikpela wok nau em long sapatim ol pipel insait long SME bisnis bikos dispela em wanpela bikpela rot long kamapim mani bilong kantri.

Mista Hu i tok gavman i mas sapatim SME bilong kantri long go long wol maket. Em i tok gavman i gat bikpela wok long save moa long rot SME bai pulim mani i kam insait long kantri.

Mista Hu i tok dispela tred fe, em long painim ol bisnis patna na strongim wok bisnis namel long tupela kantri wantaim bikplea lukluk long strong na groim ol SME.

Dispela tred fe bai bai givim sans long ol PNG SME bisnis lain long toktok wantaim ol lain bilong Taiwan long kisim sampela aidia na helpim bilong Taiwan we i gat moa long 1.5 milien SME bisnis.

Mista Hu i tok em i gat bikpela bilip long PNG gavman i sapatim SEM. Em i tok Taiwan i pulap long SME na ol pipel long hap i save wok strong long SME long kamapim ikonomi bilong kantri.

Bisnis delegesesen long Taiwan bai soim ol samting olsem, marasin, solar, bebi prodak, CCTV, rais miling masin, pats bilong kar, pis prodak na bot na ol planti moa kwaliti prodak bilong Taiwan.

Bihain long dispela tred fe bin kamap long las yia, mak bilong bisnis namel long PNG na Taiwan i bin gro long \$151 milien go long \$268milien.



Mausman bilong Taiwan long PNG, Daneil Hu i redi long tred fe.

PHILIPPINES 6 DAYS A WEEK!

Whether for business or leisure, Air Niugini now offers you even more choices for travel to and from Manila or Cebu. **Air Niugini - making your travel more convenient.**

OUR SCHEDULE

Port Moresby to Manila Return:
Tuesday/Wednesday/Friday/Sunday
Port Moresby to Cebu Return:
Monday/Thursday

Call toll free on **180 3444** or visit **www.airniugini.com.pg** and contact your nearest Air Niugini Travel Centre or Travel Agent for further details.





CA Dipatmen bilong Ramu NiCo save mekim bikpela hatwok

TAIM ol bikpela hevi i kamap namel long tok-pait na ol hevi wantaim ol papagraun na tu ol outsait lain em ol Komyuniti Afes Dipatmen bilong Ramu NiCo tasol i save go pas long stretim hevi. Em i save stap olsem namel-man long long daunim wari na hevi.

Long Basamuk Rifaineri bilong Ramu NiCo, i gat wanpela strongpela tim i stap we i save sanap strong long banisim na daunim ol bel-hevi na kros-pait i kamap namel long ol papagraun na Ramu NiCo Menesmen (MCC) Ltd. Dispela tim long Basamuk em Superintenden, Jackywang i go pas long en. Na ol strongpela nesenel wokman bilong tim em, Nick Genaia, Leffy Ovosa, Tony Gayu, Dubam Awam, Kilisi Sapom, John Unipa na stail mangi draiva yet Jimmy Kolpot husat i save holim stia bilong CA 10-sita lenkrusa long mekim planti naispela wok long helpim lokal komyuniti.

Insait long las tupela mun i go pinis CA Tim bilong Basamuk i mekim planti gutpela wok tru we i putim pes bilong Ramu NiCo i go antap long pablik i mas save wanem gutpela wok helpim kampani i wokim.

Jackywang i amamas tru long tim bilong em long BSK na i stori olsem ol i save sambai tasol taim i gat kain kain tok-nogut o hevi i kamap long goaut na givim gutpela toktok long kamapim bel-isi na wanbel pasin.

Dispela tim bilong CA long sait long Lens na Kompensesen, Agrikalsa na sapot em naispela stori tru, tasol bai yumi stori long en long bihain long ol manmeri i ken save moa.

Jackywanti tok olsem i no long taim i go pinis CA tim bilong BSK i bin givim gutpela helpim i go long wanpela medikol tim bilong Modilon Jeneral Hausik husat i bin go long Basamuk eria long karimaut fri medikol donesen na tu mekim helt aweanes.

CA tim long Basamuk i bin givim han long helpim Helt, Sefti na Enviromen (HSE) Dipatmen long BSK long givim sapot i go long dispela medikol tim bilong Modilon.

Ol CA tim i helpim long redim haus-slip bilong tupela dokta bilong Modilon em Dokta Leanne Barnett na Dokta Dorna. CA tim i helpim ol tu wantaim ol kad long kisim kaikai

long mes bilong Ramu NiCo na tu redim kar long sait long trenspot long karim ol i go long ol viles long givim ol medikol.

Tru tumas, dispela CA tim i save mekim hatpela wok tru.

Long stat bilong dispela mun CA tim wantaim helpim bilong HSE Dokta Meng Ming, Dokta Qi Tong Jun na Dokta Paul Konare i bin helpim wanpela mama husat i gat bel na gat hevi long karim pikinini.

Wanpela narapela bikpela wok em long mun Mas long dispela yia bihain long bikpela ren na wara i tait long Gawar Riva na rausim graun wantaim paipain i kamaut ples-klia. Taim dispela bagarap i bin kamap sampela papagraun i bringim kros long Ramu NiCo, tasol ol wokman bilong CA Dipatmen long BSK i sanap strong na mekim toktok i go



Ol memba bilong CA tim long BSK wantaim PR opisa.



Man long tromoi 'tok-pisin' DUBAM AWAM.



Tupela BSK CA tim memba Tony Gayu (lephan) na Kilisi Sapom glasim lokal rais gaden.

kam na daunim hevi long go bikpela.

Em CA Tim bilong BSK tasol wantaim ol strongpela opisa bilong em olsem Leffy Ovosa, Tony Gayu na Kilisi Sapom wantaim papa bilong ol Nick Genaia husat i toktok i

go kam wantaim ol papagraun klostu long Gawar na bel-isi i kamap na ol wokman bilong ol arapela Ramu NiCo Dipatmen i bringim masin i go long stretim ples long wok bilong senisim paipain i

kamap.

Tru tumas, i gat planti gutpela wok stret em CA Dipatmen tim bilong BSK i save mekim long bringim helpim bilong Ramu NiCo i go long lokal komyuniti.

Ating sapos dispela dipatmen na ol strongpela wokman bilong en i no stap, planti hevi na bel-kros bai i stap. Tasol kain stail bilong ol long toktok na kamapim wanbel na bel-isi.

salens bilong graun na masin bilong mekim wok.

Ol dispela namba i soim klia mak bilong wok mipela i pinisim:

- Moa long 4.5 miliar kubik mita bilong graun wok i pinis
- Klostu 195,000 kubik mita simen i silip pinis
- Klostu 48,000 tan stil bilding i sanap, hap long ol em ol nupela
- Moa long 2,000 yunit masin i sanap redi
- Moa long 227 kilomita bilong baret na proses paip i silip (antap long 135 kilomita slari paipain)

'Wanpela Ramu NiCo, Wanpela Komyuniti'

Ramu NiCo redi long givim

Insait long moa long tupela yia, Ramu NiCo i sanapim pinis malti bilian Kina Ramu Nikel Projek, na nau mipela i redi long komisanim.

Bihain long mipela i kisim olgeta tok orait na stretim ol teknikal wok redi, Ramu NiCo i go het wantaim bikpela wok konstraksen long namba tu hap bilong 2008. I kam inap nau, olgeta bikpela konstraksen wok long Krumbukari main sait na Basamuk rifaineri i pinis, na projek i stap redi long kisim komisani o tok orait long mekim wok. Long wol tu, dispela kain hariap sanapim em i no kamap bipo long wanpela kain bikpela projek olsem, na i daunim olgeta



Ol mama kisim salens long groim moa kumu na prut

James Kila i raitim

OL MAMA long ol ples na hauslain long Ramu Nickel Projek long Madang provins i gat bikpela salens i stap yet long groim moa kumu, sayor na ol prut long saplaim mes o ples kaikai bilong ol wokmanmeri long Kurumbukari Main na Basamuk Rifaineri.

Ol kumu na prut i mas gat gutpela kwaliti na i mas kam long bikpela namba.

Dispela salens i bin kam long Ramu NiCo Komyuniti Afeas Dipatmen Trening Opisa, Aldam Bande, bihain long em i go pas long wanpela trening bilong groim ol gutpela gaden kumu long Bom viles long Astrolabe Be Lokal Level Gavman (LLG) long Raikos Distrik.

Mista Aldam, i wanpela tisa long egrikalsa koles bipo, na em i wanpela gutpela saveman long givim skul bilong groim na kamapim gutpela gaden kaikai.

Em i save tu long ol gutpela rot bilong lukautim ol enimal olsem pik, kakaruk, pato na bulmakau tu.

Em i givim salens long ol mama na meri long Bom na Astrolabe Be LLG olsem Ramu NiCo i gat bikpela namba tru bilong ol wokman long Basamuk na Kurumbukari, na ol

dispela wokman meri i mas gat gutpela kumu long kaikai bilong ol.

Olsem na ol mama long ples i mas planim moa kumu olsem kabis, anian, bin na ol arapela kumu olsem aibika, aupa, kangkong na ol arapela, na kamapim wok kontrak wantaim ol kampani husat i kukim kaikai bilong ol wokman na saplaim ol.

Long nau yet, wanpela kampani NCS-Raibus i save kukim kaikai bilong ol wokman bilong Ramu NiCo long mes long KBK Main na long Basamuk Rifaineri.

Mista Aldam i tok ol mama i mas ogenaism o redim ol yet na kamapim bikpela gaden kumu we i mas gat saplai oltaim long givim i go long mes bilong Ramu NiCo. Em i tok dispela ol kumu saplai i mas stap oltaim na i no ken sot taim kampani i askim long moa kumu yet.

Em i tok taim i gat moa saplai i stap oltaim NSC-Raibus bai i no inap goaut long ol arapela ples long olsem long Hailans na baim kumu.

Em i tok salens nau i stap na ol mama long ples insait long Ramu Projek i mas sanap strong na redim ol yet gut long bungim dispela salens. Taim ol i redi gut ol i ken go lukim NCS-Raibus na kisim kontrak long saplaim ol kumu na prut.



Ramu NiCo egrikalsa trening opisa Aldam Bande i givim toktok long groim moa kumu long ol mama long Bom viles long Astrolabe Be LLG sampela taim i go pinis.

Buai i milien kina bisnis

...No gat takis long en

BUAI em i wanpela nat long kantri i save pulim planti milien Kina na i no gat takis long en.

Inap planti yia nau, buai i kamap olsem wanpela bikpela rot we ol pipel long planti hap bilong PNG i save kisim mani long en, na i helpim ol long laip na sindaun bilong ol.

Ol i kisim mani long buai na baim kaikai, skul fi na ol arapela samting.

Long olgeta hap kona, ol haus, ples na ausait long ol stua, ol opis na bas stop, bai yu lukim pipel i sindaun salim buai i stap.

Wanpela samting i no stret long pasin bilong salim buai long olgeta kona bilong taun em dispela pasin bilong pulapim ples wantaim skin buai na ol arapela pipia.

Long Mosbi siti, buai i kamap olsem birua long wanem, nau em i kamap olsem as bilong mekim siti i doti na bagarap. Em i kamapim bikpela het pen tu long wankain taim, ol ausait lain na ol turis i kam lukluk raun long kepitel siti bilong yumi i save ting wanem long ol

bagarap buai i kamapim insait long siti.

Bikpela samting em pasin bilong pipel husat i no tingting long troimim gut ol buai pipia bilong ol.

Dispela i wok long tupela sait. Ol lain i salim buai na ol lain i baim na kaikai buai.

Ol lain i salim buai i no save bungim ol pipia bilong ol na troimim o klinim gut hap ol i maket long en long pinis bilong de.


Na ol lain i kaikaim buai i save tromoim nabaut ol skin na pipia bilong buai na tu, ol i spet nabaut na mekim ples i doti stret.

Na nau taim Gavana bilong Nesenel Kapitel Distrik, Powes Parkop i putim tambu long salim buai long Mosbi siti, planti lain husat i save maketim buai i no wanbel.

Tasol em i asua bilong husat?

Buai em i wanpela rurel indastri na i wanpela milien kina nat i save helpim planti grasrut pipel, tasol i mas gat kontrol long hap bilong pipia, spet na lukautim siti na taun i stap klin oltaim.





Papua New Guinea
DEPARTMENT OF FINANCE

NOTIS IGO LONG OL SAPLAIA BLONG OL GUDS NA SEVES IGO LONG GAVMAN DIPATMENT, PROVINCOL NA LOKOL LEVEL GAVMAN

2013 PASIM BLONG OL AKAUNTS

TOKSAVE LONG ARERE BILONG 2013 FAINENSOL YIA LONG PABLIK OLSEM:

- Laspela dei long givim auto I niupla Integrated Local Purchase Order Claim (ILPOCS), na tok orait long komitmen igo long Gavman PGAS em long dei 14th DISEMBA 2013. Bai inogat niupela ILPOC bai go aut bihain lo displa dei, 14th DESEMBA 2013.
- Peimen bilong guds na seves igo long husat I givim ol samting long Gavman, yusim ol trupla ILPOC bai igo yet inap 31st DISEMBA 2013.
- Gavman bai baim husat saplaia sapos yu givim ol invoices blong yu igo inap arere blong bisnis long dei 13th DISEMBA 2013. Sapos yu givim ol guds na seves pastaim long 13th DISEMBA 2013, yu bai ol baim yu long 2013 yia.
- Olgeta invoices na wanem kain askim yu gat imas go long pei opis blong wanem Gavman dipatmen husat ibin usim guds na seves blong yu. Noken karim ol kleims bilong yu igo long dipatmen bilong Fainens.
- Toksave ken olsem Gavman bai baim tasol ol opisol ILPOC na APC na ino ol narapela kain kleim. Dispela emi Lo.

AUTHORISED BY
DR KEN NGANGAN CMA CPA
ACTING SECRETARY

Tim PNG givim bikpela presen long kantri



PRAIM Minista bilong Papua Niugini, Peter O'Neill i tok PNG tim we i go pilai long Pasifik Mini GEMS long Wallis na Futuna long stat bilong dispela mun i givim bikpela presen long kantri taim ol i winim dispela gem.

Mista O'Neill i amamasim tim taim em i bungim ol long Gateway Hotel long Mosbi long Septemba 14 taim em i bungim ol bihain long ol i kam bek.

PNG i winim 30 gol medol, 26 silva na 31 brons medol long kam namba wan ples.

I bin gat 8-pela spot tasol i kamap insait long Pasifik Mini GEMS na PNG resis insait long olgeta we ol i winim ol dispela medol long en.

"Yupela i kamap namba wan na apim nem bilong kantri bilong yumi long spots insait long Pasifik.

"Dispela i soim olsem yumi tu inap long winim kain ol bikpela gem na yu noken lusim wanpela man o meri tok olsem yu no inap long mekim," Mista O'Neill i tok.

"Nau yumi soim long Pasifik Mini GEMS level olsem yumi ken kamapim wankain risal long Pasifik na Komonwelt GEMS tu," em i tok.

Minista bilong Spots na 2015 Pasifik GEMS, Justin Tkatchenko tu i tok amamas long tim na strongim ol long wokhat long kamapim wankain mak long 2015 Pasifik GEMS long Mosbi.

Em i tok ol wok i stat pinis long redim ples bilong dispela gem tasol ol i noken tingting planti long dispela.

"Olgeta tingting bilong yupela i mas pas long redim yupela yet gut long pilai tasol," Mista Tkatchenko i tok.

President bilong PNG Olimpik Komiti (PNGOC), Sir John Dawanincura i autim belhevi bilong em tu long Gavman long lukluk long ol spotsmanmeri bilong kantri husat ol i save traim long strong na save bilong ol yet long karim na apim nem bilong kantri long ol kain bikpela gem tasol i no save kisim wanpela gutpela helpim.

Ai wara i kam daun long ai bilong em taim em i mekim dispela toktok na i kisim sapot bilong ol spotsmanmeri bilong tim.

Em i tok PNGOC i gat sampela tingting long kamapim wanpela kain rot bilong luksave long ol spotsmanmeri bilong kantri tasol taim em i redi bai ol i sindaun na toktok wantaim Gavman long dispela.

Praim Minista O'Neill i amamas long tingting bilong Sir John na i tok em i luksave tu long hatwok na laik bilong ol long kantri bilong ol.

Mista O'Neill i tok long dispela gem, Gavman bai givim inap long K500,000 i go long PNGOC long brukim i go long olgeta pilaia na ofisol bilong tim long gutpela hatwok ol i mekim long winim dispela Pasifik Mini GEMS.

Long wankain taim, Dairekta bilong IBS, Mick Nades, i tok ol bai givim trening bilong ol spotsmanmeri long helpim sindaun bilong ol bihain long ol i pinis long pilai spots.

Sef di Misin (Chef de Mission) or bosman bilong Tim PNG i go long Wallis na Futuna, Richard Kassman, i tok amamas long tim bilong em long gutpela mak ol i putim long dispela Pasifik Mini GEMS na tu long gutpela pasin bilong harim tok na wokbung ol i kamapim long dispela raun.

"Planti taim i save i gat ol stori nogut i kamap long sampela bikhet pasin ol manmeri long tim i save mekim, tasol dispela yia, i nogat kain ripot nogut i kamap long tim na mi amamas long dispela gutpela pasin ol i soim olsem ol nambawan spotsmanmeri bilong PNG insait na outsait long pilai graun wantaim," Kassman i tok.

Tim nau bai redi long go resis long Komonwelt GEMS long 2014 long Glasgow long Skotlen (Scotland) we PNG bai stap insait long 13 spot olgeta.

Bihain long Skotlen bai kantri bilong yumi mas bung long sapotim ol pilaia bilong yumi taim ol i traim long kamap nambawan gen long asples bilong ol taim 2015 Pasifik GEMS i kamap hia long Mosbi.

Tenkyu tu long yu sapos yu bin bihain stori bilong Pasifik Mini GEMS hia long Wantok long las tripela wik taim mipela i kisim ol stori na poto bilong gem i kam long yu.

BELHEVI: Sir John i askim Gavman long luksave long etlit. **POTO: Andrew Molen.**



PM AMAMAS: Mista O'Neill i tok amamas long PNG tim. **POTO: Andrew Molen.**



SANAP WANTAIM: Mista Tkatchenko (lephan) na Mista O'Neill i sanap wantaim ol pilaia na ofisol. **POTO: Andrew Molen.**



TENKYU: Praim Minista O'Neill i bungim ol pilaia na ofisol bilong tim. **POTO: Andrew Molen.**

Ol Kangaroo i nekim ol Kumul

Michael Novingu i Raitim

OL Australia Kangaroo 13 i nekim ol PNG Kumul na planim ol long Kalabond matmat wantaim 50-10 sko long Kalabond ragbi ligo pilai graun las wik Sande long Kokopo.

Tripela minit i go insait long namba wan hap long pilai, Kangaroos fulbek Jar-ryd Hayne i kisim wanpela gutpela bal i kam long winga Kevin Gordon na em i skoim namba wan trai bilong ol. Hap bek Adrian Sezer i kik i go insait na kisim skoa i go long 6-0.

Bihain long 10-pela minit, James Tamau i kisim bal na brukim banis bilong ol PNG Kumul na skoim namba tu trai bilong ol long kisim sko i go 10-0. Adrian Sezer i kik i go insait na kisim sko i go long 12-00.

James Tamau gen i kisim wanpela gutpela bal na givim i go long Brent Tate i brukim banis bilong ol Kumul husat i

no inap stopim em. Na em i skoim namba tri trai bilong ol na kisim sko i go 18.-00 long 20 minit bilong pilai.

Long dispela taim ol PNG Kumul i no kisim bel isi na Richard Kambo, Jessie Joe Nandye i traim strong long sko long han kais sait long Kalabond pilai graun. Tasol ol i no inap long sko bikos ol Australian Kangaroos i putim strongpela banis.

Dispela i no stopim ol long skoim trai we i lukim Paul Aiton i putim strongpela pilai i go long han sut sait bilong Kalabond pilai graun. Aiton i kisim bal abrusim tripela pilaia bilong Kangaroos na givim bal i go long winga Israel Eliab long skoim namba wan trai bilong ol Kumuls. Francis Panui i kik tasol i no go insait na sko i sanap 4-18.

Long dispela taim ol Kangaroo i yusim ol strongpela fowod bilong ol em Robbie Farah, James Tanau, David Shilington, Sam Thaiday, Ben Hannet, Corey Parker na Ryan James long brukim

na bagarapim banis bilong ol Kumul long namel lain. Bihain Kevin Gordon i kisim bal i kam long Greg Bird na kik i go long han sut sait i lukim Jarred Haynes i ran i go sko na kisim sko i go long 30-4.

Long namba tu hap bilong pilai, ol Kumul i kam strong wantaim pilai bilong ol na David Loko, Lasen Marape, Enock Maki, Petro Sanivalu, Richard Kambo, Nene McDonald, Wellington Albert na Michael Mexico i traim long brukim banis bilong ol Kangaroo long sko tasol banis i strong tumas.

Maski bikipela ren i pun-daun ol i traim strong yet na Josiah Abavu i kisim wanpela gutpela bal i kam long Roger Laka na i skoim namba tu trai bilong ol Kumul na bringim sko i go long 10-30.

Strongpela ren i mekim ples i kol na i givim bikipela sans long ol Kangaroo skoim ol trai i kam long Josh, Papaili, David Shilington, Sezer na tupela twin

brata Brett na Josh long kisim sko i go 50-10 long winim Praim Minista 13 Kap long 2013.

Long wankain taim Kokopo sumatin ragbi tim i nekim ol N.S.W sumatin ragbi tim bilong Australia long Kalabond pilai graun wantaim sko 26-22 long winim dispela pilai bilong ol.

Ol sumatin bilong Kokopo i putim strongpela pilai long namba wan hap bilong pilai i lukim ol i 5-pla trai na 4-pla ol i kik i go insait long kisim sko i go 26-0 long namba wan hap bilong pilai bilong ol.

Long namba tu hap bilong pilai, ol sumatin bilong N.S.W i kam bek wantaim strongpela pilai bilong ol na lukim ol tu i skoim 5-pla trai na kik i go insait wanpela i kisim sko i go long 22. Ol inap long win tasol taim i sot.

Long gem bilong ol meri Kokopo Sisters i nekim ol susa bilong ol Vudal Yuni- vesiti wantaim sko 16-12 long winim gem bilong ol.



MI KAM YA: Pilaia bilong Kokopo Sekonderi Skul wantaim bal i traim long brukim banis bilong tupela New South Wales Akademi skul taim ol i pilai long keten reisa bilong PM 13 long Kokopo. Kokopo Sekonderi skul i mekim gutpela pilai na winim ol NSW Akademi 26-20. *Poto Nicky Bernard.*

Namba 7 Momase Paralimpik Gems

Sumatin bilong Kaindi Divine Word Kampus i raitim

OL PIPEL bilong Wewak i laki long lukim paralimpik gems bilong Momase rijon i kamap long Tunde na Trinde las wik.

Paralimpik gems, em ol lain i gat sampela hevi long bodi olsem, aipas, lek bruk, lek nogut, han nogut, baksait bruk na ol kain lain olsem i save pilai. Em i namba 7 gem bilong ol Momase i holim paralimpik gems long rijon tasol em i namba wan taim long pilai i kamap long Wewak.

Ol i save holim nesanel gems long Nesanel Kepitel tasol i no gat inap mani long go long Mosbi olgeta taim, olsem na ol yet i pilai long

wan wan rijon.

Ol lain bilong pilai i go wantaim ol gem edministreta na ol wok lain bilong klap bilong ol. Ol i kam long Madang, Is Sepik, Sandaun na Morobe. Tasol sori tru long Morobe tupela lain tasol wantaim lida bilong ol i bin kamap long pilai. Sampela i wok long kam yet long sip na ol pilai i kirap pinis long Tunde 23 Septemba.

Ol i bin holim wanpela seremoni long opim ol pilai long Tunde 23 na i pasim wantaim seremoni bilong presentesen long Trinde 25 Septemba insait long Kaindi Divine Word Kampus haus kibung.

Ol i resis wantaim ol pilai olsem tromoi diskas (dis), javelin (spia) na sot put (raunpela hevi ain), soka,

basketbal, volibal, 100 mita, 200 mita, 400 mita na 800 mita ran.

Olgeta gems i pinis long Trinde 25 Septemba, na bihain ol opisa i givim ol win medal na tropi.

Sampela lain bilong pilai i brukim tu ol wol rekot long dispela taim. Presenta bilong ol i tok amamas long olgeta. Olgeta provins i kisim gutpela namba bilong winim medal.

Ol i kisim gol, silva na brons medal. Tupela bilong Morobe tu i kisim medal bilong win. Sandaun i rekim planti moa medal, na long olgeta em Madang kisim moa tropi na moa gol medal.

Ol i pinisim gutpela taim wantaim wanpela liklik bung kaikai bihain long presentesen.

Gari Bal winim BSK snuka fainol

James G. Kila i raitim

GARI Bal bilong Gumine long Chimbu Provins i soim stret stail na kala blong em taim em i rausim tiket bilong ol arapela long winim gren fainol bilong Basamuk Independens De Snuka Kompetisen.

Bal i winim arapela wanwok bilong em Issac bilong Limestone Dipatmen long winim gren fainol na kisim wanpela DVD pilaia.

Dispela Basamuk Snuka kompetisen long Independens De em wanpela Ramu NiCo wokman yet bilong ERT Seksen, Martin Yaringa i ogenaisim long mekim ol wokman i ken amamasim Independens De wantaim sampela stail bilong ol yet.

Dispela kompetisen i kamap bikos Kampani long dispela yia i no redi wanpela spots progrem o pilai nabaut long amamasim ol woklain.

Martin i stori olsem 18 lain i bin resis long kompetisen na wan wan lain putim K10 olsem rejistresen fi. Em yet i kisim ol rejistresen na i redim ol prais na tu glasim ron bilong kompetisen.

Dispela kompetisen i bin kamap long 8 klok nait long Sande Septemba 15 na fainol i kamap long 2 klok.

Martin i tok olsem taim ol manmeri long ol taun na ples insait long PNG i bisi tru long amamasim 38 krismas bilong kantri, tarangu ol wokman bilong maining na petroleum indastri i bisi tru long wok i stap. Planti i no go long lukim ol selebresin

bilong independens. Ol i harim tasol stori taim ol famili i ring long mobail fon na tokim ol.

Gari Bal, husat i save wok olsem wanpela opereta long skru konveya long Basamuk Rifaineri Prodaksen eria i bin go insait long fainol bihain long em i rausim tiket bilong tripela arapela pilaia long tripela namba wan gem. Em i win gen long kwata fainol na dispela i opim rot bilong go insait long gren fainol wantaim Issac.

Gari i tok em i amamas long winim DVD pilaia bikos em i no bin winim kain prais olsem bipo. Em i tok em i save pilai na winim mani na bia bipo taim em i stap long Mosbi na tu long Hailans, tasol nau em prais tru tru em winim na em i amamas stret.

Nambawan Trophy Haus kisim rait long salim Kumul jesi

Nicky Bernard i raitim

NAMBAWAN Trophy Haus em namba wan stua long salim ol Kumul jesi na ol samting bilong PNG Kumuls long mekim kepein bilong ol long Wol Kap long dispela yia.

Ol jesi we Nwth bai

salim em sampela ol yet mekim, na sampela ol patna bilong ol i mekim na salim kam long ol.

Insait long olgeta Nwth em bai yu lukim ol i salim ol Kumul jesi, sampela ol T Siot bilong ol trening na sampela bilong ol sapota.

Ol putim ol dispela jesi taim ol pilai wantaim ol Aus-

tralia Kangaroos long Kokopo long wiken i go pinis. Dispela sem yunifom bai ol kisim go pilai long Wol Kap long dispela mun.

Nambawan Trophy Haus i bin amamas long wok wantaim PNGRLF long salim ol jesi na yunifom bilong ol Kumuls long stua bilong ol.



Bos meri bilong Nambawan Trophy Haus long Vision Siti i sekim ol jesi bilong ol Kumuls em ol i salim nau. *Poto Nicky Bernard*



SKOA PRELIMINERI FAINOL

Fraide: Septemba 27, 2013

ANZ Stadium
Rabbitohs 20 Manly 30

Sarare: Septemba 28, 2013

Allianz Stadium
Roosters 40 Knights 14

TRAI TAIM ... Michael Jennings (R) amamas wantaim Mitchell Pearce (L) na James Maloney.

Oi Rooster i pinisim gut wik bilong ol wantaim bikipela win egens New Castle long 40-14 win long Sydney Futbol Stadium na bukim ples bilong ol long neks wik gren fainal salens wantaim Manly neks wiken.

Foapela trai long strongpela 13 minit long seken-haf gem long pinisim sisen wantaim ol sapotas bilong Knights i singaut strong long givim strong long ol.

Tasol strong bilong Roosters i no givim wari o guria long singaut bilong narapela sait i kilim dai lam bilong skwat bilong kosa Wayne Bennett long 40-14 win las wik.



2013 NRL GREN FAINOL DRO

Sande: Oktoba 6, 2013

ANZ Stadium




FRIDOM EM BILONG MI ... Glenn Stewart (rait) i kisim sas long low-gret hai takol bihain long em i givim han sut takol long Sam Burgess, em fri long dispela takol na lukluk long pilai long gren fainal dispela wik. (Getty: Matt King)

Glenn Stewart na Michael Jennings i fri long pilai long gren fainal bihain long ol liklik sas

MANLY bekrowa Glenn Stewart na Sydney Roosters senta Michael Jennings i fri long pilai long NRL gren fainal long neks wiken bihain long low-level takol sas. Tupela i kisim sas long taim ol i pilai strong long tim bilong ol husat i winim gem long prilimineri fainal las wiken. Sas bilong tupela i no strongpela sas na tupela i fri long pilai neks wik NRL gren fainal.

KISIM BAGARAP ... Long las NRL fainals, Danny Buderus (rait) i kisim strongpela hansut long pes bilong em taim Jared Waerea-Hargreaves i nokim em strong na em kisim bagarap. (Getty Images: Mark Kolbe)



LAS pilai bipo gren fainal, strongman bilong Knights, Danny Buderus i kisim bagarap long han bilong Jared Waerea-Hargreaves na pinisim gem long ol i lusim NRL gren fainal sans bilong ol. Buderus i save kilim skin bilong em long olgeta 257 gem em i save pilai wantaim Knights, em i save pilai na salim bodi bilong em wantaim nogat pret.



FM100

PNG's Information & Music Leader

SUNDAY 6 OCTOBER
2013 NRL GRAND FINAL



7:15PM
ANZ STADIUM

ALOTAU 107.1	BUKA 100.8	KARKAR 100.5	KIUNGA 100.3	LORENGAU 100.3	MT. DIMOOIMO 107.1	NAMATANAI 100.3	RABAUL 100.8	TINPUTZ 100.8
AMBUNTI 100.8	DARU 100.5	KANDRIAN 100.1	KUTUBU 100.2	MADANG 100.8	MT. HAGEN 100.3	NCD 100.3	RAMU 100.3	TOLUKUMA 100.1
ANGORAM 100.8	DREIKIRKIER 100.8	KEREMA 100.8	LAE 100.5	MAPIRIK 100.8	MT. HOREATOFA 107.5	NUKU 100.8	TABUBIL 100.3	WATERHOLES 107.1
ARAWA 100.3	FINSCHHAFEN 100.4	KIKORI 100.5	IADIFU 100.2	MARKHAM 100.5	MT. KAINGUMA 107.1	PALMAMAL 100.8	TARI 100.5	WAUBULOLO 100.8
BOGIA 100.5	GOROKA 100.2	KIMBE 100.3	LIHIR 100.3	MT. BOREGORD 107.7	MT. TURU 100.8	POPONETTA 100.5	TELEFOMIN 100.3	WEWAK 100.8

LIVE GAME CALLS

Ol spot eksen poto long Kokopo...

Ol Poto Nicky Bernard.



TENKYU LONG KAM PILAI: Praim Minista Peter O'Neill i sekan long Sam Thaiday long Kokopo taim ol i laik kik ov long pilai.



BIKPELA SAPOT: Ol sapota bilong Kumuls i no isi long baim sapota jesi bilong Kumuls. Maski em bikpela mani ol dai hat bilong Kumuls i baim tasol long soim sapot bilong long Tim Kumuls taim ol pilai long Kokopo ENB.



WELKAM LONG KOKOPO: Gavana bilong Is Nu Briten, ToBaining na Lod meya bilong Kokopo i welkamim tupela brata Morris long Kokopo taim ol pundaun long ples balus long Tokuwa.



SU LUS: Bikpela fowod bilong Kangaroos i lusim su bilong em taim ol Kumuls i takolim em.



SPIT MAN: Namba wan bilong Australia Kangaroos Jarryd Hayne i traim long aburusim Ase Boas tasol nogat, Boas i stopim em.



Brent Tate bilong Kangaroos i spit long putim trai.



SENISIM YUNIFOM: Charlie Wabo na Robbie Farrah i senis yunifom trausis bilong tupela bihain long pilai pinis.

Tenkyu long PM Midia Yunit na Newcrest long kamapim ol dispela poto.



Moa oil na meat insait



Ol 23 pilaia i redi long Wol Kap

YU KAM: Ase Boas (6) bilong PM 13 Kumuls i no wari long bikpela sais na hevi bilong Sam Thaiday. Em putim gut was taim Thaiday ran kam long em. Kumul i lus long dispela gem 50-10. Lukim ol poto bilong Kokopo pilai insait. *Poto Nicky Bernard.*

Nicky Bernard i raitim

MASKI ol Kumul i lus long wol ragbi lig sempion tim long Kokopo 50 -10, planti pilaia bilong Kumul i gat nem long stap insait long Wol Kap tim long pilai long Englan long dispela mun.

Planti ol PNG pilaia husat i pilai long ol ovasis tim i stap insait nau long Kumul tim. Tupela wik bihain bai ol i kam bung wantaim ol Kumul bilong PNG na redi long go long Englan.

Planti asples Kumul i no bin fit long taim ol i bungim Australia Kangaroos long Kokopo long las wiken. Na planti bilong ol i kisim bagarap long skin long taim ol i bin pilai.

Siaman bilong Papua Niugini Ragbi Futbol Lig, Don Fox i tokaut long nem bilong 23 pilaia husat bai karim nem bilong Papua Niugini long pilai long ragbi Wol.

Ol dispela pilaia bai go long kem long Oktoba 7 bipo long ol i go long Englan long Oktoab 14. Bai ol i pilai sampela gem bipo long Wol Kap gem. Bai ol i pilai egens Skotlen long Oktoba 19, na opim Wol Kap pilai wantaim Frans long Oktoba 27 long MS3 Kraven Pak long Hull.

PNGRFL bai gat wanpela bikpela fanraising kaikai long Sarere 12 Oktoba long Dynasty long Pot Mosbi. Olgeta Kumul pi-

laia husat bai go long Wol Kap long bai kamap long dispela kaikai.

Don Fox i tok tenkyu long ol selekta long mekim bikpela wok long makim ol pilaia.

“Em bikpela na longpela wok long makim ol pilaia na ol dispela selekta i mekim nambawan wok wantaim kosa dairekta, Mal Meninga na het kosa Adrian Lam,” Don Fox i tok.

Em i tok tu olsem i gat planti yangpela pilai i stap insait long skwad husat i soim kala bilong ol long Kokopo.

Fox i tok tenkyu i go long Gavana Erema ToBaining Junia long provins bilong em i lukautim dispela bikpela pilai, Prait Minista Peter O’Neill na gavman bilong em long strongim ragbi lig long kantri na ol bikpela sponso olsem PNG LNG, Air Niugini, NGCB na PNG Pawa.

Ol 23 pilai i stap insait long Kumul tim bilong Wol Kap em: Josiah Abavu, Paul Aiton, Dion Aiye, Wellington Albert, Ase Boas, Jason Chan, Neville Costigan, Israel Eliab, Richard Kambo, Roger Laka, Enoch Maki, Larsen Marabe, Nene McDonald David Mead, Mark Mexico, Jessie-Joe Nandy, Sebastian Pandia, Francis Panui, James Segeyaro, Jason Tali, Ray Thompson, Charlie Wabo, Menzie Yere.

Het kosa em Adrian Lam na kosa dairekta em Mal Meninga.





PMV

DIESEL OIL



BOROKO MOTORS

PORT MORESBY	☎ 325 5255
LAE	☎ 472 1144
MT HAGEN	☎ 542 1933
TABUBIL	☎ 649 9048
KIMBE	☎ 983 5035
MADANG	☎ 422 2659
KOKOPO	☎ 982 8193
GOROKA	☎ 532 3552

Email: info@borokomotors.com.pg
 Website: www.boroko-motors.com

PMV OIL BILONG YUMI